

NGÀZAMÀ, LOKÙSÈTÀ, YELEKÈ, HAZILÀ

 Twasàkidila, Mwanèètù Neville. Mvwa mumòne nè bàvwa munkaci mwà kutentemuna cikòlokolo cikesè, anyi, anyi bàbàndisha díyì. Nudi mwà kungumvwa bìmpè anyi? Mbìmpè. Kùdi . . . Twasàkidilaayi.

Lutàtu lukesè, ànu katanci kakesè, mpàvwà, mwanèètù kampàndà mwimànyike kàshinyi kèndè mwaba mubi pambèlu apa, nè bantu, ngèèla meejì, mbaswè bwà yèyè kuàtentemuna. Ke civwà bwalu. Nè yèyè . . .

[Mwanèètù Gene Goad ùdi wàkula nè Mwanèètù Branham bwà bikòlokolo—Muf.] Eci cidi *kaaba aka* nunku anyi? Ambà tǔng bu mèmè muumùshe eci nunku ewu? Nudi mwà kunguumvwa bìmpè anyi? Ndi . . . Aci's mmùyàkwambabo mu Kentucky nè: “Tuvwa twelela mbila ku kaacipuka kàà cyanààna.” Mvwa ntàngila mu cikòlokolo *eci*, nè *eci* ki civwà nè cyà kwikala cyòci. Abi's mbìmpè. Twasàkidila, Mwanèètù Gene. Mpindiyewu, leelù ewu, bìdi . . .

² Tudi nè disànka dyà kufila mulubù wa disangisha dyà mu—mu Middletown, mu Ohio, lumingu lushààle, anyi lumingu lwà kumpàlà kwà lushààle, mmwòmò's, mpindiyewu. Aci's civwa ncikondo cyà butùmbi bwètù twètù. Tuvwa nè . . . Kaa, masangisha kaàvwa manène bikolè to. Kàdi pàvwa kule ne cimenga mu mwaba kampàndà wùdìbo bàbìikila nè Chatauqua, lwà pambèlu apu, kilòmèètà dikùmi nè yìsàtù anyi dikùmi nè yinaayi pambèlù pàà cimenga. Kàdi mwa—mwaba wà kusòmba wùvwa mupàte tètè, nè ùvwa mwambùle bantu binunu bikesè. Ncyèna mutàmbe kumanya bwà kucinka bùngì bwà misùmbà yà bantu to. Nènku cintu cyà musinga, civwa nè, Yesù wàkatwilangana neetù, nènku ke cidi luseke lwìmpè ncyòci aci. Nè cyàkatwàla bipeta binène, kùdiYe tudi tupèèsha butùmbi, Mukalenge Nzambi, bwà ditwènzela cyòci eci.

³ Nènku kùvwa bàmwè bàà ku bantu bàà batàmbe bwìmpè bànkadiku mutwilàngàne naabò kacya bàndela, mu ditùnga adi. Nè bu mùdìbi nè tudi pabwìpì menemene nè mikàlù mwab'ewu, ndi mufwànyine kwamba nunku nè, bàvwa byà pa lukàmà makùmi citèèmà ne citèèmà beena Kentucky. Cintu cyònsò muntwamu civwa Kentucky. Mwanèètù Sullivan kwabayè nè: “Mwanèètù Branham,” yèyè nè: “udi mumanyè nè, bònsò, pàmwè nè bònsò mu cibandabanda cikesè cidi cipìcila munwemu eci, mbeena Kentucky anyi?”

Ke mèmè nè: “Ncivwa—ncivwa mumanyè aci to.”

Yèyè nè: “Èyowà’s, s’ki cìdìbo.”

4 Kàdi dilòlò kàmpàndà mu disangisha kwenzekabì ànu nè nteelà nè: “Mbanganýi kaaba aka bàdì bafùmine ku Kentucky, elààyi byanza byènú muulu.” Mèmè kuzenzakana, mèmè kudyàmbidila nè: “Kùdikù muntu wa ku mwaba mukwàbò anyi?” Ànu buludi, beena Kentucky.

5 Nè bipeta bìvwa byà nkèmenu, majaaniki àbùngì be! Kùvwa mu—muntu mukàlàngà kàmpàndà, makèèlèlè awu, uvwa ùpìcilamù, kupìcilayè mwaba awu nè kungambilayè bwà bintu kàmpàndà bìvwa byenzèke, nè mikàndà mimfùndila yìbwela, nè majaaniki mashìilèshìilàngàne. Nè pashìishe kùvwa . . .

6 Kùdi muntu mukàlàngà lwà paanyimà apa munkaci mwà kukwàta mikàbà ànu mpindyewu ewu, nè kwambayè, dilòlò kàmpàndà, ngèèla meeji nè yèyè mmwàmbè “dilòlò dyà ndekeelu,” pàmvwà nyiisha pa kaamukanku kakesè aku. Ke yèyè kwamba nè . . . Mu mulongo wà dijingulula, anyi bìvwa bifwànyìne kwikala mu batèèleji, ncyèna mwà kujaadika nè ncyèpì to, kàdi kùvwa muntu kàmpàndà uvwa ufùmina mu batèèleji. Ke Nyumà Mwímpè kubanga kuyiikila nendè, nè kumwambila nè yèyè kàvwa wa mu ditùnga adi to, kàdi yèyè ùvwa wa mu Indiana, mwaba kàmpàndà mu Indiana mwàmwa. Ke yèyè nè: “Kwèna mwimàne kaaba aka bwèbè wèwè mwinè to. Udi mwimàne kaaba aka bwà mwànà mukèsè wa mu dibòko, ànu ngondo mikesè cyanààna, pàmwàpa ngondo yìsàtù,” nè cintu bu nàнку awu. Nènku ùvwa nè cyà kupandiibwa, nè bìvwa bikèngela bwà kumupàtulabò mwoyi. Nènku cìvwa ngiikàdìlù wa—wa wènzà luse; bisùlusulu byàkù bikèsè abi byùlè, cyàdì cyàkù; kaacifù kààkù kakesè aku kàvwa kafwatàlale. Nè kumwambile bwà kuya pambèlu, bwà kèèdi mpatà to; nè bu yèyè kàyì mwà kwela mpatà to, ùvwa mwà kusangana mwanèndè awu bimpè.

7 Mpindyewu, ntèmù ùdi ànu mu cibambalu cìdì cìlondà eci mpindyewu, nè pàmwàpa mwànà wa mu dibòkò awu ùdi mu batèèleji amu, bwà ku dyànyì pàànyì dimanya. Bisùlusulu byà mwànà wa mu dibòko awu kupinganabì mwàbì nè kale, nè kaacifù kakesè aku kupinganakù mwàkù nè kale. Nènku muntu udi ukwàta mikàbà yà mèyì kaaba aka awu, wà ùmwè wà ku mikàbà yà mèyì mu dindà emu awu, kulwayè nè maamù, taatù, nè wèndè . . . mwena mutumba wa udi ukwàta mikàbà yà mèyì ewu, nè kulwayè naabò, nè mwànà wa mu dibòkò awu, nè kusòmbeshabò mwànà awu mu cibambalu amu, nè kwelayè mukàbà wà mèyì awu, cìvwa EMU MMÜDÌ MUKALENGÈ WÀMBA. Ke kwambayè nè pàakafikabo mu cikondo cìvwa muntu mukàlàngà awu nè cyà kulwa kwimana yèyè mwinè ku cibumbà cyà ku cyambilu aku, nè: “Nyumà Mwímpè kubwelayè mu cibambalu amu, bwalu kùvwa kusòmbè mwànà wa mu dibòkò ànu mwaba awu, ùdila nè wènda ùnàya, nè ùtùngunuka.” Kabyàkakèngela dipandiibwa to. Bangàngàbukà

kabàvwà nè cyà kupanda to. Mukalenge wàkapanda mwànà awu, nè Bukolè Bwèndè bunène, bunène abu. Nènku mwànà mukesè awu musòmbe mwaba awu, munkaci mwà kunàya pa bulààlù bukesè, nè—nè maamù nè taatù basòmbe mwaba awu, nè mwena mutumba uvwa nmwà kwikala nè mpatà kakesè bwà cintu cyònsò aci; kàdi ki Bwikadi abu's. Aci cyôci kaciyi diitabuuja dyà bàpostòlò to, ncyèna mumanyè nè ncinyi to.

⁸ Nudi bamanyè's, Bible mmwambè, pàvwà Yesù, ku mùpostòlò Peetèlò nè Yone, mwondòpe mulèmà awu ku ciibi, “Kabàvwà bafwànyine kwamba cintu nànsha cìmwè cyà cibèngàngàne naaci to, bwalu muntu awu ùvwà mwimàne mwaba awu bu ntèmù.” Pa nànkù, Kilistò ùcidi ànu nè mwoyi. Butùmbi bwikalè kùdi Dìna Dyèndè. Busàmbi kaayipu mu matùkù aa's wè! Mpindyewu, aci's cidi ànu bùmwe bwà mu majaadiki àbùngi. Kàdi cidiku mu ditùkù edi, bwà kujandula nè Nzambi umweumwe awu, nè byenzedi bimwèbimwè byà bikèmesha abi, bintu bimwèbimwè byàkenzàYe abi, Yèyè ùdi ùbyènzà mùshindù ànu wùmweùmwè awu leelù ewu, bwalu Yèyè ùdi umweumwe awu makèèlèlè, leelù, too nè kashidi. Tudi nè kusàkidila bwà kwikala nè dyèsè dyà kwikalakù badìsangìshe mu dindà emu mu Dìna Dyèndè.

⁹ Mpindyewu, túsambidilaayi patùdi twenda tuya ku mwaba nè ku mwaba apu, bwà kukwàcila Mukalenge mudimu mu dikùmbanyina dyàtùbùikidilàye adi. Nènku tudi nè disànkà dyà nè kakwèna ànu bàà ku tabernacle ewu to, kàdi bàà ku myaba yònsò, mu ditùnga dijimà emu.

¹⁰ Twasàkidila, mwanèètù wa bakàjì. Aci's cìvwa ncintu cyà lulamatu. Ndi mumanyè nè Nzambi munène wa mu Dyulu ùvwà mukumòne wenza cintu cìmwècìmwè aci. Inàbànzà kampàndà, mwànà mutekète menemene kutàmba mukwàbò, musòmbe kaaba aka. Nè mukàjì uvwa mu budimi bwà bwambi bwà Mukalenge, bidimu kumpàla kwà mèmè kulediibwa, yèyè nè bàyèndè; bidimu makùmi àtaanu nè byà mu njila, ùyiisha Èvànjeeliyò. Mwikàle ùkwàta mudimu mu biinà byà mabwe à makàla, bwà kumutwà nyama ku mikòlò mu budimi kampàndà, bwà kuyiisha Èvànjeeliyò ùndi ntwà nyama ku mikòlò ewu. Mukàjì mukùlumpè awu ùvwà musòmbe kumpàla eku, kàyi nè dikàpàkàpà to, ùkùpula bisùùlùlù kwisù kwèndè; nè nsongààkàjì ùjuuka kuulu nè ùlwa nè ùmutwàdila dikàpàkàpà dyèndè. Pa nànkù, ndi nnwàmbila nè, ndi nè disànkà dyà kwikala mudìsangìshe mu dindà emu nè bantu bàà mùshindù awu abu, cìngenza disànkà dyà nè ndi mwena Kilistò, nè kudìsangìsha pàmwe nè beena Kilistò.

¹¹ Mpindyewu kùdi luuyà lukolè be mu ditùnga dyètù emu, nè mu ditùnga dijimà mpindyewu. Nènku tudi bindile dilwa dyà muvù wà mabèji àpòòpoka, pìikalà kuulu ne citeleela ndambu. Disangìsha dyètù dinène didi dilondà ditùdi bamanyè didi mu San Jose, mu Californie. Ke mwaba wutùvwà mu cipalu

cyà cialu cyà cinsangànsàngà bwà matùku makesè, nènku kùvwa dikùngwila dinène, ditùvwa katùyi mwà kufùdishwa bwà kubàkùba to nànsha kakesè. Nènku misumbà yimwèyimwè ayi yidi munkaci mwà kutùdila masangisha àcilwalwà mfrangà mpindyewu ku cipalu cyà cialu cyà cinsangànsàngà ku San Jose. Nè tudi nè dyeyemena dyà nè panwikalà nusombela kuntwaku, anyi balundà, bàfùndilaayi mukàndà nùbambilè bwà kwikalabò mu disambila. Byòbì kabiyi nànkù to, ikàlaayi munkaci mwà kutùsambidila.

¹² Mpindyewu, leelù ewu, mvwa mutèèje nè mvwa nè cyà kwikala mwab'ewu mu dindà emu, bwà kutwilangana mu masambila nè mu misengeleelu kùdì Mukalenge, nè nwènù bònsò. Nènku kwòkù kwikàle beenyi munkaci mwètù, tudi tulòmba luse mùdì nzùbu wetù kàyi mwela byamù byà mashika, kàdì twètù tudi ànu èkèleeziyà mupèlè, mu bintu byà pa buloba, kàdì mubanjì mu Diitabuuja mu Bukalenge bwà Nzambì. Nènku tudi tunùjingila difika dilenga bwà ditùkùmbula dikesè edi, tulòmba bwà nwènù kwalukila nè kwikala neetù cyàkàbìdì. Dìngà ditùkù tudi tutèkemena bwà kwikala nè èkèleeziyà mutàmbe bwìmpè.

¹³ Katwèna nangànanà mu byà kwibaka kwà nzùbu yà èkèleeziyà mu matùkù aa to, bwalu tudi twitabuuja cyà bushùwà, nè mwoyi wètù wònsò nè, Mukalenge Yesù ùlwalwa kàtààtaakà. Kàdì pàdì bampàndànjlà bàsanganyibwa mu budimi bwà bwambi, munkaci mwà kuyiisha Èvànjeeliyò, kabàyi nè bisàbaatà ku makàsà to, bàdya musangu ùmwè ku ditùkù, mmunyi mutùdiku mwà kwibaka èkèleeziyà wa ùyiila ndola mùliyò mujimà kumpàlà kwà cyòci aci? Ncyèna—ncyèna ànu mwà kucimòna to, nè pashiishe kwamba nè: “Mukalenge ùlwalwa kàtààtaakà.” Tùbwelàayi mu budimi bwà bwambi bwà kwenza citùdì mwà kwenza mu lukòngò elu. Kòkù kwikàle lukwàbò, nànkù... Bòbò nebàndamunè bwà lwàbò; twètù netwikalè bwà kwandamuna bwà elu. Kwènà ànu mwà kwibaka nzùbu yà yiyiila mìliyò yà ndola, nè bikwàbò, paanyimà pàa mumanè kwikala mu budimi bwà bwambi nè mucimòne.

¹⁴ Mpindyewu, mbilenga. Ngèèla meeji nè bìvwa bìkèngela bwà nzùbu wa Mukalenge kwikalayè mulenga. Nènku bìvwa bìkèngela bwà kwikalakù ka—kaaba kakesè kansantu. Kumwenza mwakàne nè mulenga wa dikèma nè mwèndè mwònsò, kàdì kì ncintu kampàndà cyà cinèkèshe to, bwalu katwèna tuumvwa cyòci aci to.

¹⁵ Mpindyewu kumpàlà kwà twètù kusambila nè kubala Mifundu, ndi muswè kufila ci. . . kì nkuyiisha mu dindà emu to, kàdì kufila muyiiki pa mifundu. Nè pa ciibidilu pàndì ndwa. . . Ntu ngèenza cyòci eci ànu mu èkèleeziyà wanyì sungasunga, nè tudi mu èkèleeziyà wetù. Katwèna dìngumba to. Twètù katwèna tusungulujangana bilondèshile màngumba to, kì ngiikàdìlù wetù, nè katwèna baswikàkàne nè èkèleeziyà nànsha umwe

mu milongo yà dīgumba to, kàdi tūdi badisangè nè beena kwitabuuja bōnsò bàà mǎngumba ònsò nè bantu bōnsò pa buloba bujimà. Kaèkèleeziyà kèètù kakesè aka, mu dindà emu, nkamanyike pa buloba bujimà. Mikàbà yà mēyì yinùdì... Mayiisha aa, ànu makòsòlòke mùdiwu emu, kàdi pèètù tutwàtwa nyama ku mikòlò, mu madimi à bwambi, (mmatunga meenyi búngì kaayi?) matunga meenyi dikùmi nè citèemà, ànu pa mikàbà nkààyaayi.

¹⁶ Matunga dikùmi nè citèemà mashìllàngàne àdi àngata Mayiishi nè àakudimuna. Muntu kampàndà, ànu bu mùndì munkaci mwà kuyiisha emu, muntu kampàndà wimana mwaba wàwa munkaci mwà kuyiisha ànu pāmwe naanyi. Nénku bàdi bènda bàya mu tuzùbù twà nsonà nè mu myaba kuntu kwàka kùdì Nzambi kàyì nànsha mumanyikè to, nè bàyiisha bampàngaanù abu, nè kùdì beena kalaba bàà mu Àfrikè nè mu Àmèrikè wa ku Sud, nè pa buloba bujimà, nè nkàmà yà bantu kuvudija ku nkàmà yìdì munkaci mwà kulwa kùdì Mukalenge. Bààbùngì bàdi munkaci mwà kwondopiibwa. Nénku's ke bwà cinyi tūdi tudyumvwa nè mbyà mushinga wàbùngì bwà kusàka Mukenji, kí mmu nzùbu minène nè bikwàbò nànsha.

¹⁷ Nénku pashìishe pàndì mwab'ewu apa, ndi ànu nè malongesha à kuleeja pa Mifundu cyanàànà. Kàdi, pàndì mpàtuka nya mu budimi bwà bwambi, ncitu nyiisha Malongesha kampàndà à èkèleeziyà to, bwalu, kwenza nànkù, bìdì bìcìvwija cikolè be. Bantu nebàmbè nè dyànyì "Dilongesha ki ndyà cyà bushùwà to," anyì cintu kampàndà cyà mùshindù awu. Kàdi wèwè muyiishè dimwè... Mémè nyiisha dilongesha dyà ba-Méthodistes, ba-Baptistes kabààkutwà ku cyànyì to. Mémè nyiisha dyà ba-Baptistes, dībà adi ba-Luthériens kabààkutwà ku cyànyì to. Mémè nyiisha dyà beena Mpenta, dībà adi ba-Nazaréens kabààkutwà ku cyànyì to. Mémè nyiisha ba-Nazaréens, dībà adi église de Dieu kààkutwà ku cyànyì to. Pa nànkù, nudi numòna's, bikèngela ùtwe cintu kampàndà nyama ku mikòlò, kàdi, mu kulonda kwà cipaapu cyà mudimu, twètù tūdi ànu twakidila mwena kwitabuuja yònsò, nànsha twitàbàayi webè anyì dīgumba dyèbè diikàle cinyi. Paùdì ànu mulediibwe cyàkàbìdì ku Nyumà wa Nzambi, udi mwanèètù wa balùme nè mwanèètù wa bakàjì. Kàdi tutu misangu yònsò ànu tujinga kudilama mùshindù ewu.

¹⁸ Nè pashìishe, bu Mukalenge mwà kwanyisha, leelù ewu, ndi muswè kuyiisha, mu èkèleeziyà wetù, èkèleeziyà wetù mmwimanyine pa Dilongesha dyà Bible, cìdì èkèleeziyà ùtwa nyama ku mikòlò aci, nè bwà cinyi tūdi twenza cyòci eci. Nè mu kwenza kwà nànkù, tūdi nè cyà kufùka anyì... katwèna nè meeji à kwenza nànkù to, kàdi tūdi bafwànyine kujuula nkonko mu meeji à muntu kampàndà, wamba nè: "Èè, kacya ncitukù mulongèshìibwe mu cyà nànkù to, anyì ku Cìitabuuja mu mùshindù kampàndà to." (Twasàkidila.)

19 Nènkù byòbì byenzèke nè nwênù...èkèleeziyà wenù kàyì wìtabuuja to, anyì kwèna wìtabuuja ànu bintu bitùdì twakula bu Dilongesha dyètù dyà èkèleeziyà to, tudì batwìshìibwe nè kabyàkutwàla lutàtu nànsha lukesè to. Bwalu, cidya mene cyà kumpàlà cyà ditanta mu bwena Kilistò, nè bwà kuleeja nè muntu mmupetè Nyumà Mwìmpè, ndidipwekesha, didipwekesha dilelèlè difidiibwe kùdì Nzambì, Dìdì nè cyà kufidiibwa nè didipwekesha dyònsò. Kàdì, nànsha nànkù, èkèleeziyà udi kàyì nè Dilongesha ùdì ànu mùdì cintu citulùmùke amu; kèna nè mufùbà wà mwongo to. Pa nànkù, tudì nè cyà kwikala nè mufùbà wà mwongo munda mwàcì. Nè kaciyì kàbìdì ànu mufùbà wà mwongo to, kàdì nè mènù, kàbìdì, bwalu Èkèleeziyà wa Nzambì ùdì nè cyà kudyà Dyàmpà dyà Mwoyi.

20 Nènkù twètù, mu àmwè àà ku mēyì àndì mufwànyìne kwamba, mēmè muteetè bwà kuCibweja bikolè, mpindyewu swàyi bwà kanùCyùmvùku bibì to. Aci, ncyèna nè meeji à kwikala nè ngaakwilù mukàyàbàle, mu kulongesha kwà Bible to. Kàdì mēmè, munda mwà bidimu makùmi àsàtù byà bukèbikebi, nciyì ngàngata twitabàayi anyì cintu nànsha cìmwè to ànu Dìyì...Kùdì bantu mwab'ewu bàdì ba-Presbytériens, beena Kàtòlikè, ba-Baptistes, beena Mpenta, ba-Nazaréens, beena église de Dieu, Ba-Pèlerins de la Sainteté, mbasòmbe bònsò kaaba aka. Nènkù ndi mumanyè nè èkèleeziyà nè èkèleeziyà yònsò ùdì nè twitabàayi wendè sungasunga, nè ncyèna muswè kwimanyika aci to, kàdì ndi nteeta ànu bwà kupàtula Mifùndu patòoke bwà kucyènza nè Mifùndu. Pa nànkù dībà adi bònsò—bònsò nebùmvwè nè kī mbwà kwikala nè ngaakwilù mukàyàbàle nànsha. Bìdì ànu bwà kwikala nè dinanga nè dinanga, nè luse, nè mwànyì pàànyì mwònsò mùndìku mumanyè mwà kuumvwija Mifùndu amu.

21 Nènkù mpindyewu cyena-bwalu mu dindà emu neciikalè bu cyena-bwalu cile, nè ncyèna njinga kulwijakaja to. Ndi muswè kwangata dībà dyàbùngì ànu bwà bìngiikalà mwà kwamba, nè kuteeta kubyùmvwija, bwà cinyì tudì tucyàmba.

22 Misangu yàbùngì mu masangisha, muntu kampàndà neámbe nè: “Èè, cidiye wìtabuuja ncinyì? Yèyè ùcidi ànu Baptiste, anyì? Yèyè mmwena Mpenta anyì? Ùdì wìtabuuja dyakula dyà mu myakulu anyì? Anyì, ùdì *cikampàndà*, anyì *cikansanga* anyì? Yèyè mmwena dikùbiibwa dyà Cyendèlèlè anyì? Anyì, ùdì cinyì?” Nè dībà adi udi utèlèlè ànu cintu kampàndà cyùdì aci, nebàkuluke bu bìlùngà byà mudilu. Nàsnha bìshi, kabàkutùùja bwà kutèeleja, bwà kukenketa to, kàdì nebàkulekèlèlè nè lùkàsà lwònsò.

23 Mwaba nànsha wùmwè mu masangisha àànyì, mu dībà nànsha òmwè, ncitukù mwanjì kumanya byà dishiya dyà dibenga kupetangana munkaci mwà bàna bèètù abi to. Ntu misangu yònsò ànu nyiisha Dilwa dyà Mukalenge, lupàndu,

nè—nè dyondopa dyà kùdì Nzambì. Aci kacyèna citàpa muntu nànsha umwe ku mwoyi wa Èvànjeeliyò mu Kaabujimà to.

²⁴ Pashiishe mu èkèleeziyà emu, ndi nè Dilongesha dyètù sungasunga. Didi dipàtuka munkaci mwà bantu bàdì bàlwa, nè bàmba nè: “Èè, mèmè. . . Mwanèètù Branham’s mmwambè *cikampàndà*, bintu abi.” Èè, bikèngela twìkalè nè Dilongesha.

²⁵ Mpindyewu, ànu àbìdì mashààle aa mu disangisha, pàvwà muntu kampàndà mukonkè musùmbà wà bambi. Bafùndì bàànyi nè bakwàbò bàdipù. Mikàndà mimfùndila yàbùngì, yàbùngì mmilwè, nè yàmbà nè: “Mwnèètù Branham ùdì witàbuuja di—dikùbiibwa anyi dilama, dikùbiibwa dyà mwena kwitabuuja anyi?” Èè, mvwa mumanyè, mu kasùmbù kàà beena nè ànu mikenji ke bàvwà bèèla lukonko alu, mbifwànyine kwikala bikolè bwà mèmè kucyàmba; mbafwànyine “kuumushakù byanza” nè lùkàsà lwónsò. Nènku aci kacyèna nè cìdici cishintulula to nànsha kakesè nànsha wèwè witàbuuja aci anyi to; pàdìbì ànu nè udi musùngìdìibwe, ke cintu cyà musinga ncyôci aci. Nènku ncìvwa mwambè cintu nànsha cìmwè to. Kàdi èkèleeziyà mishiilàngàne dikùmi nè yisambòmbò yàkabènga kutùùla mfrangà, nudi numòna kùdì . . . bwalu ndi mubènge bwà kwandamuna, bwà dilama dyà bwobùmwe nè bantu.

²⁶ Mpindyewu, mu èkèleeziyà mu dindà emu, ndi muswè kuumvwija bwà cinyi ndi ngiitabuuja cindi ngiitabuuja.

Tùsambilàayi.

²⁷ Mukalenge, Wàkabiisha cyàkàbìdì Yesù ku bafwè awu, nè kutupèeshaYè bu Mulàmbù wà dinanga Dyèbè kutùdì, nè ku dyoweshangana dyà màyi ku Dìyi, Yèyè mmujidile cisàmbà cyà pabwàci, kasùmbù kabìikila bwà kupàtuka, nènku tudi bindile nè lutùùlù lwónsò Dilwa Dyèndè Diibìdì. Nè tudi bamanyè nè, ku mèsù kwà bantu, kùdì twitàbàayi nè màngumba bùngì cyanààna. Nènku, Taatù Nzambì, tudi baswè kulòmba bwà Ubeneshèku yònsò wa kùdìbo. Nè ngiimànyinù udibò baciimànyine, nànsha mutùdì mwà kubèngangana naabò pa bintu byàbùngì, nànsha nànkù, mu mèyi makùlù, bu beena Kilistò nè bàna bàà muntu, tudi beelàngàne naabò kàpà. Nènku kí ng’ànù beelàngàne ànu naabò kàpà pàtupù to, kàdi batèèkèle mwoyi pàmwè. Mu ditùkù dyà dibenga kucyùka dyà maalu edi, pàdì bantu nè mutù mukolè nè badibàndishi, banangi bàà bisànkasanka byà pa buloba kutàmba Nzambì, tudi tulòmba, Èyi Nzambì, bwà Nyumà Mwímpè àswikèku myoyi yètù pàmwè menemene, bònsò, ku ditùkù nè ku ditùkù. Ondòpàku babèèdì mu dindà emu, Mukalenge.

²⁸ Kùdì aba bàdì nè cyà kubwela mu dibàtiiza dyà mu màyi. Nènku tudi tulòmba bwà Nyumà Mwímpè Webè àbùjèku nè (kùdì) Bwikadi Bwèndè bóbò kabàyi banji kubùpeta. Swàkù bwà bàtwibwè citampi kule nè bintu byà pa buloba, nè bùlè tètè nè

Nyumà wa Nzambi, mu dinanga dyà Nzambi, nè mu bwobùmwe nè bantu bônso.

²⁹ Mukalenge, munkaci mwà matungà à buloba bujimà, bu mûdi muntume, mèmè muntu mupèlè udi kàyì mumanyè mukàndà, kàdi nànsha nànkù, Mukalenge, mwikàlè ngiitabuuja munda mwà mwoyi wànyì, Kùdi, bintu bìndi mwitabùùje nè mulongèshìibwe kùdi Bible, nè bishindika kùdi Mwanjèlò wa Mukalenge Udi mwimàne kaaba aka bwà kushindika cidi cyambiibwe, pùikalàci cyà kùdi Nzambi. Misangu yàbùngì, bantu bàtu bèèla meeji nè mèmè ndi mudì wa cibàngà. Wèwè ngudi mulumbulwishi wa mwoyi wànyì. Kàdi bu Pòlò wa kale awu, wàkayiisha mene nè cyena Yuda too nè pàakapetàye dyeyemena kùdi bantu, nè pashìishe kuyiishayè Kilistò mupoopela pa nkùrusè; kàdi dyàmbedi bwà kupeta dyeyemena kùdi bantu, bwà Mukenji wèndè wàmòna mwà kwikala mutwè mukèlè. Tudi tulòmba, Éyì Mukalenge, bwà Wèwè kutwishakù mukèlè muyiiki wètù nè bwobùmwe bwètù, nè Mukèlè wà Nyumà, nè Mashi à Mukalenge Yesù, nè àtùvwijèku bantu bàdi babiikidiibwe, nè bwà bàà pa buloba bààmòna mwà kutàngila nè kutàbaleela myoyi yètù, nè pashìishe kulwa nè nyòòtà bwà kwikala bu twètù. Tùlamèku badipwekèshe, nè buujiibwe tètè nè dinanga Dyèbè nè Nyumà Webè. Bwalu tudi tulòmba nùnkù mu Dìna dyà Ewu Wàkasambila bwà twètù kwikala umwe awu, dībà adi, bwà bantu bônso bààfwànyina kumanya nè twètù tuvwa bânà Bèndè, patùdi nè dinanga muntu bwà mukwèndè. Amen.

³⁰ Mpindyewu, bwènù nwènù, ndi mumanyè nè kùdi luuya ndambu. Nè kòkù kwikàlè—kwikàlè dikàpakàpa dyà panshi lwà paanyimà apa dīdībo baswè kutwàla mwaba kanà wónso, wùdi mufwànyine kumwèka mutàmbe bwimpè, mbimpè. Ndi njinga kubalakù ndambù mpindyewu mu Mifundù Minsantu.

[Mwanèètù Neville ùdi wàmba nè: “Cipeepudi eci cidi cikutàcisha anyi?”—Muf.] To, mukalenge. Kí mpàdici panshi mùshindù awu to. Ngèèla meeji nè mbifwànyine kwikala bimpè, Mwanèètù Neville.

³¹ Ndi muswè nùbuululèku pàmwe naanyì mu Mifundù, ku Mukàndà wà Yowèlà, nè pashìishe ndi nè myaba yàbùngì mwab'ewu yīndi muswè kwanji kubala, dyàmbedi, bwà kupeta muyiiki kampàndà, dyumvwija kampàndà bwà muyiiki. Dyàmbedi, mu Yowèlà, nshapità 1, kubangila ku mvensà 1, nènku kubala mvensà mwi4. Nè pashìishe mu nshapità mwi2, wa 25 too nè ku wa 27, netùbalè bwà dibala dyà Mufundù.

Nènku dīyì dyà MUKALENGE . . . dyàkalwa kùdi Yowèlè mwànà wa Petùèlè.

Tèèlejààyi eci, nwènù bantu bakùlumpè, nè tèyaayi dīci, bantu bônso bàdi basòmbèle pa buloba ebu. Eci ciwaku cyenzèke mu matùkù ènù, anyi mene mu matùkù à baatatwènù anyi?

Nücyambilaayi bânà bèènú balela, nè bânà bèènú balela bàmбилè bânà bààbò balela, nè bânà bààbò balela lukòngò lukwàbò.

Bwà nè cìvwà mukùmbì wà ngàzamà...mushiye mukùmbì wà lokùsètà wàkacìdya; nè cìvwà mukùmbì wà lokùsètà mushiye mukùmbì wà yelèkè wàkacìdya; nè cyàkashiyàbò kùdi mukùmbì wà yelèkè mukùmbì wà hazilà wàkacìdya.

³² Nè pashìishe mu mvensà wa 25 too nè ku wa 27, wa nshapità mwi2.

...Nènnwalijulwile bidimu bìvwà mukùmbì wà lokùsètà mudyè, mukùmbì wà yelèkè, nè mukùmbì wà hazilà...mukùmbì wà ngàzamà nè mukùmbì wà hazilà, cilwilu cinène cìmvwà mutùme munkaci mwènù.

Nènkù nenùdye nenùükutè, nè nenùsànkishiibwè, nè nenùtumbishe dinà dyà MUKALENGE Nzambi wenù, wìkala munwenzèle maalu à kukèma: nènkù cisàmbà cyànyì kacyàdyàkufwìshiibwa bundù nànsha.

Nènkù nenùmanyè nè mèmè ndi munkaci mwà Izalèlèlà, nè mèmè ndi MUKALENGE Nzambi wenù, nè kakwèna mukwàbò nànsha umwe to: nè cisàmbà cyànyì kacyàdyàkufwìshiibwakù bundù nànsha.

³³ Pashìishe mu Mukàndà wà Loomò, nè mu nshapità wa 1 wa Loomò, nè mvensà wa 25, ndi mbàla eci nùnkù. Netwàngatè wa 24, kàbidi.

Ki bwà cinyì Nzambi wàkabàfìla ku dikooyika kupicila ku nkùkà yà myoyi yàbò sungasunga, bwà kufwìsha mibidi yàbò mene bundù munkaci mwàbò bóbò biinè:

Bààkashintulula bulelèlè bwà Nzambi kubùvwija mashimi,...

³⁴ Nè pashìishe mu Loomò, nshapità mwi3 ku mvensà mwi4. Loomo mwi3, ku mvensà mwi4, tudi tubala. Katùpà kàà kumpàlà kàà mvensà mwi4 awu.

Nzambi kùtabiku to:...Nzambi ìkalè mulelèlè, kàdi muntu yònsò mwena mashimi;...

³⁵ Mpindyewu tudi tubwela mu meeji à musinga mukolè pa cyena-bwalu eci. Nènkù mpindyewu tudi...Ndi ngiitabuujà nè nekùlwe cikondo cyà dyalujulula dyà bintu byònsò bìdì byenjiiibwe bibi abi. Nènkù tudi tuteeta, nè byònsò bìdì munda mwètù, nè bantu bakwàbò bàdi munkaci mwà kuteeta, batangadiki banène bu mùdi Billy Graham nè Oral Roberts, nè bakwàbò bààbùngì bàà ku batangadiki bàà batàmbe kumanyika abu, bambi, bampaasàtà, bàdi nè lulamatu ku mwaba wàbò wà mudimu, bàdi bàteeta kumòna ditàbuluja mu cikondo cyètù. Nè nwènù, bânà bàà Nzambi, nudi munkaci mwà

kusambila bwà ditàbuluja mu cikondo cyètù. Binunu makùmi byà masambila bidi bitwilangana nè Nzambi dîbà dyònsò, bwà ditàbuluja mu cikondo cyètù. Nè mbafunde mu Mifundu nè: “Bantu bàdi babiiikidiibwe ku Dîna Dyànyì bôbò badikungwije pàmwè, nè bôbò basambilè, dîbà adi Mémè nèntèelejilé mu Dyulu.” Mpindyewu, pùikalà bânà bàà Nzambi munkaci mwà kudisangisha nè bàsambila bwà ditàbuluja mu dîbà dyètù edi, nè ditàbuluja kadiyikù dilwa to, dîbà adi kùdi nè cyà kwikala cintu cipampàlâmùke mwaba kampàndà.

³⁶ Mpindyewu, vùlukàayi, nè, cintu kanà cyònsò eci cidi mwà kukwàta mudimu ànu paùdi ukwàta mudimu bilondèshile mukenji wà cintu aci. Makolè à mu cibwàshibwàshì àdi mwà kunyunga ànu bilondèshile mukenji wà mu cibwàshibwàshì. Mabùlùngù àdi mwà kutentemuka ànu pàdiwu matentèmùnyiiibwe kùdi mukenji wà mabùlùngù awu. Dîbà didi mwà kupàtuka ànu bilondèshile mùdi buloba bùyungulukila ku dîbà. Nè dyòdi adi, didi, cintu cyònsò cidi nè cyà kwenzeka bilondèshile mukenji wà ndongamu wadi. Bwalu, Nzambi wàkenza bintu byònsò, nè wàkenza mukenji bwà cintu aci. Nè pashiiishe cidi nè cyà kunyunguluka, nè kukwàta mudimu, kwenza bilondèshile mukenji wà cyôci cintu aci. Kacyàkukwàta mudimu mu mùshindù mujaalàme mùshindù mukwàbò to.

³⁷ Kwela munyòlòlò ku kàlayi, nè pashiiishe kumwela ku scie. Udi mufwànyine kwikala mukùmbàne bwà kwenza ndambù wa dîbà. Kàdi mùshindù wùmwèpelè wuwikalàku mwà kwenza dîbà dikùmbàne nè mùyòlòlò awu, ngwà kwela kàlayi kàdi kakùmbànàngàne nè kàlayi kàdi paanyimà pààkù, nènkù pashiiishe masòsò makesè àdi mu mùyòlòlò awu àdi àpetangana, ànu menemene nè kàlayi, dîbà adi udi mwà kuya mwaba kampàndà.

³⁸ Nènkù ndi mutwishiiibwe nè tudi nè kàlayi kabi mwaba kampàndà. Èkèleeziyà ùdi wènda ùtamba kuya nè lujòòkò bwà dîbà ditùdi nè mwoyi edi. Kùdi cintu kampàndà cipampàlâmùke ànu menemene. Nènkù mbujitu butwimikila mu ditùkù edi, ku Dilwa dyà Mukalenge didi pabwipi edi, bwà kusòmba panshi nè kulonga nè kumòna cidi kaciyi cyènda bilenga, kumanya cidi cicilelà. Kwèna mwà kupeta bwanga paùdi kùyì mupetè ciledi cyà disaamà to.

³⁹ Bu ngàngàbukà, bu wèwè mwà kubwela mu birò byèndè kàdi kwamba nè: “Mutù wùdi wùnsaamà, nè cifù cidi cinsaama,” nè yèyè kukupèèsha ka-aspirine kakesè, anyi cintu kampàndà, nè kukupingaja, ùdi ùteeta ànu bwà wèwè kumushiiila kaaba. Ngàngàbukà, mulelèlà mukùna ku dikàsà neènzè mateeta à cintu aci too nè mwàpetàye cidimba cidi kaciyi cyènda bimpè, pashiiishe kukwàcila mudimu ku cidimba aci.

⁴⁰ Ke mùshindù wùdibi bwà Bukalenge bwà Nzambi. Bidi bìkèngela bwà twètù kujandula cidi kaciyi cyènda bimpè to, dîbà

adi kukwàcila mudimu ku cyôci aci. Mifundu yidi bu mùdi kabèji kàà bwanga kàà ngàngàbukà amu.

⁴¹ Ngàngàbukà kampàndà, beena maalu à mamanya, udi wenza mudimu mukolè bwà kupeta kabèji kàà bwanga bwà . . . bwà di—dishipa dyà kîshì kampàndà, dîsaamà dîdi mu mubidi wèbè, bu mùdi mubidi kapyà wà cîfòyidè, anyi—anyi dîsaamà kampàndà, didîbo mwà kukupèeshila mâyi ikalà mwà kushipa kîshì kàà cîfòyidè aku, nè kàbidi kàdi nè cyà kujomonyiibwa nè mbàbi yônsò (. . . ? . . .), kujoomonyiibwa nè mbàbi yônsò, mu mùshindù ewu nè: kwôkò kakûyi búngi bukumbàne bwà cyôci aci to, kacyàkwambulwisha mubèedi awu to; nènkù kwôkò kwikàle cintu kampàndà cikwàbò cisàkidila, ncifwànyine kushebeya mubèedi awu. Bikèngela cîfidiibwè kùdi musumbishi wa manga à lwondapu, ànu bilondèshile kabèji kàà bwanga aku.

⁴² Ki bwà cinyi, kwôkò cintu kampàndà cibi mu èkèleeziyà leelù ewu, cidi cyènzà nè kèna útanta mu mùshindù wùvwàbi bikèngela to, cidi bwà ku dyànyi pàanyi dimòna nè bivwa bikèngela bwà twètù kwalukila ku Kabèji kàà bwanga, kujandula ànu menemene cidi cibi, nè èkèleeziyà ewu ùdi ùsaama bikolè nè kùdi dîsaamà mu èkèleeziyà wetù, dîsaamà dyà mpèkaatù. Dîbà adi tudì nè cyà kujandula cívwa Ngàngàbukà mufundè, nè kumòna bampaasàtà bèètù basumbishi bàà manga à lwondapu aba ní bàdi bàtupèesha Kabèji kàà bwanga kajaalàme. Nènkù, vùlukà nè, udi mwà kusàkidila cintu kampàndà ku Mufundu wà pabwipi menemene ùdibo bapetè, nè kushebeya mubèedi awu. Nè pàmwàpa, ncyèna ngàmba nè ke citùdi benzè to, kàdi ambàayi tûng bu nè bàmwè bàà ku benji bàà manga bètù bàà manga à lwondapu aba mbasàkidile cintu kampàndà ku Kabèji kàà bwanga kàà Nzambi? Piikalàbo basàkidile, bàdi bàshipa mubèdi, bàbàlekela bàfwila mu mpèkaatù.

⁴³ “Èè, cidi,” mùdi wamba, “èè, piikalàbi nè bàvwa nè meeji matòoke!” To, aci kî nkabingila to.

⁴⁴ Muntu, mwenji wa manga, wàkapèesha muntu àcide carbolique, munwemu bidimu bishàale ebi, mwikàle ànu nè meeji matòoke nè mwèndè mwônsò, nè kàfwànkoolò kamanyike kùdi mbùlâmàtadi, kàdi bwàkashipa muntu. Nànsha nànkù, yèyè ùvwa nè meeji matòoke. Kakwèna . . . Meeji matòoke, nkààdikù mumòne meeji matòoke munkaci mwà bampàngaanù, àdi mafwànyine kufikisha meeji matòoke à bwena Kilistò ku dimwèka bu cintu kampàndà cyà cikùlukulù. Nkààdikù mumòna bampàngaanù bàvwà mwà kutèeka bânà bààbò bàà mu mabòkò mukana mwà ngandù, bwà kumulàmbula kanzambi kàà mâyi. Ncivwa mwà kupeta meeji matòoke à mùshindù awu munkaci mwà beena Kilistò to. Nkààdikù mumòne bantu bàvwà mwà kwikala balàale pa misongolo. Nè kucibula mifùbà yà makàsà àbò pàcidibo bânà bakesè; mvwa mubàmòne bàngata bânà bàà mu mabòkò nè bânà bakesè abu, nè bàbàtapa nè

bwà Èkèleeziyà awu kwalujuludiibwayè ku cyôci aci, anyi kààkwimana mu bukolè bwèndè nè butumbi bwà ngiimànyinù wèndè wa dyàmbedi awu to.

⁵⁰ Cizubu cyôci cilamùnyiiibwe ku mucì, tudi nè cyà kwalujakù cizubu cyàkàbidì. Kutòlwesha cizubu, dyàmbedi. Kwènà mwà kupeta pommes paùdì kùyi mwânji kutòlwesha cizubu to. Bwalu, cizubu ke njila udi màyi à mucì àlondela. Njila wa màyi à mucì njila wa mwoyi.

⁵¹ Nè Mifundu, Bible wa Cijila wa Nzambi, ke njila wa Mwoyi bwà èkèleeziyà kanà yònsò ewu. Mmunyi mutùdi mwà kutwàdila màyi à mwonji wà mvinyò mu cizubu cyà mucì wà sukòmò? Kabyàkukùmbana ànu to. Tudi nè cyà kwikala nè cizubu cyà Mwonji wà mvinyò. Tudi nè cyà kwikala nè cizubu cyà ku cibangidilu. Nènku kùdi mùshindù ànu wùmwepele wùdi bizubu abi mwà kwalukila pa Mwonji wà mvinyò, mpàdi Nzambi ùcikolesha, Yèyè mwinè.

⁵² Twètù katwèna mwà kwenza cikwàbò nè kucitèèkapù to. Kabyàkukùmbanakù to. Màyelè nànsha àmwè menza ku byanza byà bantu kaàdyàkukùmbanakù nànsha. Nebikengela njila wa Nzambi bwà cyanàànà kacyàkwikala nè mwoyi to. Màyelè makwàtakaja kùdi bantu awu kaàkukùmbanakù to. Udi mwà kujingila mukùsù ku mucì, kàdi kwamba nè: “Ùlekèle wùkolè.” Mukùsù kawùvwa ndongamu wa Nzambi to. Bikèngela cikale cizubu, njila wa mwoyi, nè pàdiwu wùfùmina mu miji, newùpatulè mwoyi wùmweùmwè wùvwa naawù mucì awu kumpàlà kwà twìshi kuwùdyatù.

⁵³ Kabyèna bikèmesha to mutùdi katùyi mwà kwenza tumpanyè twà dyondopa. Kabyèna bikèmesha to mùdi èkèleeziyà mipandùlùke. Kabyèna bikèmesha to mwikalà umwe wàmba nè: “Kaa, *cikampàndà*, *cikasanga*, nè *cikankènga*,” bibèngangana mùshindù awu. Kabyèna bikèmesha to mùdi tusùmbusumbu bu nànu munkaci mwètù to, mbwalu katwèna mwà kukwàma mamuma malelèlè à lutùlùlù, mwoyi mule, bwimpè, bupòle, kalolo to. Nshinga wa Mwoyi mmukòshiibwe ku Mucì, nè katwàkuwùbàndishila ku twitabàayi ya mukùsù kampàndà anyi nì nku cizubu kampàndà cipingaja nànsha. Nebikengelè bukolè bwà Nzambi wa Bukolè bwònsò bwà kutòlwesha mucì awu cyàkàbidì mu ngiikàdilù wawù.

⁵⁴ Yesù kààkambakù, nè Mifundu mmyambè nè: “Bàdi nè mèsù kàdi kabàyi mwà kumòna to, bàdi nè maci kàdi kabàyi mwà kuumvwa to anyi?” Kabèèna ànu mwà kucyènza to. Nè muntu nànsha umwe kèna mwà kulwa kùdi Nzambi, anyi kùdi Kilistò to, pàdi Nzambi kàyi mumubuulwileci.

⁵⁵ Ditùkù adi mvwà ngààkula, nènku tuvwa twelangana meeji ku Mifundu. Mèmè kwamba nè: “Mbwa cinyi bantu kabèèna mwà kumòna Cyôci aci’s?” Mèmè nè: “S’ki cyôci aci,” ke mwàkamvwilàbi bwà mèmè kudyàmbidila. Nànsha

Dyôdi ditòòke dyà bishi, nànsha Mifundu miDilongeshe bishi, kanwàkwikala bakumbàne bwà kuCimòna to pàdi Nzambi kàyi munùleejèCi to; nànsha Cyôci citòòke bishi. Nè Bible mujimà mmwibakila, nè Èkèleeziyà mujimà wa Nzambi udi nè mwoyi, mmwibakila pa dibuulula dyà nyumà dyà Dìyi. Abèlè wàkalàmbula mulàmbù mwimpè kutàmba wà Kaayinà bwà cinyi? Bwà cinyi Abèlè kàakalondakù Kaayinà; yèyè's ùvwa nè èkèleeziyà mutàmbe bulenga? Kàdi bàakamubuulwilaci.

⁵⁶ Pàakafùmà Yesù ku Mukùnà wà Dikùdimuka dyà mpàla, nè kwambabo. . .

“Bantu bàdi bàmba nè Mèmè Mwànà wa muntu ndi nganyi?”

⁵⁷ “Umwe wàmba nè ‘Eliya,’ nè umwe wàmba nè Wèwè udi ‘mupròfeta awu,’ nè bikwàbò.”

Yèyè nè: “Kàdi nwènù nudi nwamba nè Ndi nganyi?”

Peetèlò kwambayè nè: “Wèwè udi Kilistò, Mwànà wa Nzambi udi nè mwoyi.”

⁵⁸ Yèyè nè: “Udi mubènèshìibwe, Simonà, mwànà wa Yona, bwalu kî mmusunya nè mashi bìdi bikubuulwile eci to. Kacya kùtukù mucilongèle mu mikàndà kampàndà, anyi mu sèminèrè kampàndà, anyi mu citùùdilu kampàndà cyà màyele makwàtakaja kùdi bantu to. Kàdi Taatù Wanyì mu Dyulu ngudi mukubuulwileci, nè pa lubwebwe elu Nèngiibakilèpu Èkèleeziyà Wanyì, nè biibi byà ifèrnò kabyènakù mwà kuMutàmbe bukòlè nànsha.” Ki bwalu mbwòbù abu’s, dibuulula dyà nyumà dyà Dìyi dyà Nzambi.

⁵⁹ Mu Maatàayi 11, ngèla meeji nè mmwômò, anyi 12, mwaba kampàndà muntwamu, bàakafùnda nè, mùdibo bambè nè: “Nànsha mùvwà Yesù mwenzè bishimà byàbùngi amu, bimanyinu byàbùngi byà nè Yèyè ùvwa Maasiyà abi, kàdi bantu kabàvwa ànu mwà kuciitabuuja to. Bwalu Yeshàayi wàkamba nè: ‘Bàdi nè mèsù kàdi kabàyi mwà kumòna to. Bàdi nè maci kàdi kabàyi mwà kuumvwa to.’” Mmunyi? Nànsha mene mùvwàbò balongì bàà mabàla amu, nànsha mùvwàbò mu katòngòbèla kàà maalu à ntèndeleeleu amu; bàvwa bàà cijila, nè kabàyi kalèma nè kabàyi kadyuwù to. Bòbò babàsangàne nè katòba kàmwè kàà bubì, bàvwa bààshiiibwa mabwe, kakùyì luse to. Muntu nànsha umwe kàvwa mwà kutwà munu pa bwalu abu to. Bàvwa bàlonga Mifundu, muunya nè bufuku, ku lukòngò nè ku lukòngo, kàdi Nzambi ùcivwa ànu mubàfòfòmìje mèsù.

Wèwè udi wamba nè: “Nzambi wènza nànkù anyi?” Ke cyàkambàYe ncyôci aci.

⁶⁰ Nzambi ùdi wènza cidiYe muswè kwenza aci. Katwèna mwà kuMwambila cyà dyenza to. Pòlò, mu Mukàndà wà Loomò, nshapità wa 8, kàakamba nè: “Nzambi wàkajuula Pàlò nè wàkapapisha mwoyi wèndè, kumufòfomija mèsù, bwà kiipàcilà kàmwèkàmwè aka, bwà diswa Dyèndè dyàmònakù

mwà kukumbana” anyi? Esawù nè Yakòbò kabàvwa...? Esawù, wàkabèngiibwa, kumpàlà kwà mwànà wa balùme awu kulediibwayè; Nzambi wàkamudyombola. Nudi numòna’s, byònsò abi bìdi bìkwàta mudimu bilondèshile didyànjlà-kulongolola dinènè dyà Nzambi. Yèyè kî ng’Ewu udi mulààle tulù to. Yèyè mmumanyè ànu menemene.

⁶¹ Nè tudi tulumbulwisha bantu bilondèshile wabò... bimwèke ànu bu nè, dyeyemenyiibwa dyàbò anyi meeji àbò matòòke. Tudi tulumbulwisha maèkèleeziyà bilondèshile ditanta dyàwò. Tudi bakashààle bàà mu cikampàndà, tudi twangata batangadiki, bwalu mbanène. Kî ng’Aci to.

⁶² “Maulu nè buloba nebìjiminè, kàdi Dìyì Dyànyì kadyàkujiminakù to.”

⁶³ Cyàkashiyàbo kùdi ngàzamà, hazilà wàkacidya. Kùdi cintu kampàndà cibi, mwaba kampàndà, bwalu Dìyì dyà Nzambi ndyà Cyendèlèlèlè ànu mùdìYe wa Cyendèlèlèlè amu. Nè Dìyì dyà Nzambi kadyèna mwà kupangilakù to ànu mùdì Nzambi kàyì mwà kupangila, Yèyè mwinè amu. Mpindyewu, kùdi cintu cibi, mwaba kampàndà.

⁶⁴ Pa nàнку twàlukilààyaaku mpindyewu. Cishimikidi mpindyewu citùdi batèèke eci. Twàlukilààyi, twàngatààyi cyena-bwalu cyètù cyà Loomò 3.4 nè: “Dìyì dyà muntu yònsò diikalè mashimi, kàdi Dìyì dyà Nzambi diikalè Bulelèlè.”

⁶⁵ Nèmbwejè eci nè mu ndòndò, nè ndi muswè bwà nwènù kutèèleja. “Ciikalèku Nzambi, Bulelèlè.” Twànjààyi kulonda cidi Nzambi mwambè, cidi muntu mukwàbò kanà yònsò ewu mwambè nànsha ciikàle cinyi. Ndi muswè kwangata bintu binaayi bishìilàngàne byà ku bìndi mmòna mu Mifundu, bìdi bìshì ebi bidyè ku èkèleeziyà wa Nzambi udi nè mwoyi, nè bishiyè Mvinyò wa Nzambi mucibukile panshi, anyi mushingùke.

⁶⁶ Netwitabè, nwènù ba-Méthodistes nenwitabè, nwènù ba-Baptistes nenwitabè, nwènù ba-Presbytériens, nwènù beena Mpenta, nwènù ba-Nazaréens, nwènù bònsò nudi nwitaba, tabernacle ewu ùdi witaba nè: “Kùdi cintu cibi.” Nènku twètù, tabernacle, tudi bapiile ànu mùdì bakwàbò bònsò amu, bwalu: “Ewu udi mumanyè bwà kwenza cidi cimpè, kàdi kàyì ucyènza to, kùdiye mmpèkaatù.”

⁶⁷ Mpindyewu twàlukilààyi. Nènku ndi muswè kutèèla bintu binaayi mu dīnà, ànu mùndi mumanyè nè ke mùdibi amu bilondèshilàngàne nè Mifundu, bìdi bìshì ebi bidyè ku Èkèleeziyà, ku ngiikàdilù Wendè wa kumpàlà, wa ku cibangidilu awu.

⁶⁸ Mpindyewu, cintu cyà kumpàlà, èkèleeziyà wàkatèèkiibwa mu Ditùkù dyà Mpenta. Peetèlò wàkayiisha diyiisha dyà—dyà dibanjija ku mudimu wà dyabanya dyà màpòlomè, pààkalediibwà Èkèleeziyà. Èkèleeziyà wa beena Kilstò

wàkalediibwa mu Ditùkù dyà Mpenta. Nènku piikalàbi nè Nzambi ngwa kàyì mikàlù, kàyì mikàlù, nè kàyì mwà kushintuluka to, Èkèleeziyà Wendè ùdi nè cyà kushààla ànu mwàkadiYe ku cibangidilu amu. Nudi nwitaba aci anyi? Èkèleeziyà ùdi nè cyà kushààla ànu umweumwe awu mwàkadiYe amu.

⁶⁹ Kàdi muntu mmutelàkàjileKù bintu, mwêlemù èndè muumvwija. Kanùteecikù bwà kuumvwija Dîyi dyà Nzambi to. Amba wêwè ànu cididi dyamba. Nànsha Dyôdi diikale bishi, pa nànkù ditèèkè wêwè ànu mu njila wa Dyôdi adi, kwàjiki. Kùshintululu Dîyi to. Bible mmwambè, nè: “Mifundu kî nyà didyùmvwijila dyà muntu pàa nkàayèndè to.” Katwèna nè bukenji bwà kwamba bintu ebi to; bidi bikèngela ànu bwà twètù kuDìbala nè kwamba ànu menemene mùdiDi dyamba amu, nè kuDìitabuuja mùshindù wùmwèwùmwè awu. Nànsha Dyôdi òmwèka dicimbè munyi; Dìtàbùùjè, nànsha bishi.

⁷⁰ Cyambilu kî mmwaba wà kwelela bilèlè to. Mmwaba wà meeji matòòke. Ncyèna muswè kwamba eci bwà kwela bilèlè to. Ndi muswè kwamba eci bwà kutèèla cintu kampàndà cìvwàbo bangambile. Yèyè nè, kùvwa mwanèètù mukùlumpè wa bafìike lwà mu sud mwàmwa, ùvwa mwambùle Bible, nè mfùmwendè wa mudimu awu ùvwa ùmuseka. Yèyè nè: “Kwèna mwà kuMubala to; udi muMwàmbwile cinyi?”

⁷¹ Yèyè nè: “Ndi muMwambùle bwalu ndi muMwitàbùùje.” Ke kabingilà kimpè nkòkò aku. “Ncyèna mwà kuMubala to, kàdi ndi mumanyè nè kùdi cintu kampàndà mu Yèyè amu. Ncyà bushùwà.” Yèyè nè: “Ndi mene ngiitabuuja nè ‘cipusu’ cyà pambidi Pààwù aci. Mbafùndepù nè ‘Bible wa Cijila’. Ndi ngiitabuuja Cyôci aci.”

⁷² Yèyè nè: “Cintu kanà cyònsò cidi Bible mufwànyine kwamba nè enzà aci, ndi ngèela meeji nè udi mufwànyine kucyenza?”

⁷³ Yèyè nè: “Èyowà’s, mukalenge. Wêwè mucibalè mu Bible, mèmè nèncyènzè piikalàci n’Dîyi ditùma dyà Nzambi.”

⁷⁴ Yèyè nè: “Kàdi bu mèmè mwà kubala mu Bible awu, nè kukwambila nè Mukalenge mwambè bwà wêwè kutùpika kupicila mu cimanu aci, cimanu cinène cyà mabwe aci? Mmunyi mùdiku mufwànyine nànsha byà munyi kutùpika kupicila mu cimanu cyà mabwe kamùyi disòsò?”

⁷⁵ Yèyè nè: “Wêwè mubale cyôci aci mu Bible, nè Mukalenge mùngambile bwà kutùpika, Yèyè mmufwànyine kwikala nè disòsò mwòmù pangàfikàku.” Nènku aci’s ncyà bushùwà.

⁷⁶ Nzambi mmwambè nànkù, nànsha Cyôci cìmwèka cyà macimbu bishi, wêwè udi wela cidya kumpàlè pa Cyôci apu. Mbulaàlè kùdi Nzambi bwà kutàbaleelaYè bìdi bishààle, abu mbwalu Bwendè. Bwèbè wêwè mbwà kwela cidya.

⁷⁷ Mpindyewu cìmwè cyà ku bintu byà kumpalà bîndi njinga kwakula neenù bwà tusunsa tukesè etu. Paanyimà pàà twètù bamanè kujandula nè cishìmikidi cìdi nè cyà kwikala cyà ku cibangidilu, cìdi nè cyà kwalukila ku cishìmikidi, cìdi nè cyà kwalukila ku mwaba wùvwàci Mwonji wà mvinyò aku. Cintu kampàndà cyòci kaciyi cìmpè kùdici to, nè Mwonji wà mvinyò kawùyi wènza mudimu bîmpè to, twàlukilèbi bwà tùkajandulè cìdi kaciyi cyènda bîmpè nànsha.

⁷⁸ Mpindyewu, cìmwè cyà ku bintu byà kumpalà bîndi njinga kuteela, ncyà nè cintu kampàndà ncyumùke mu èkèleeziyà wetù, cìmwè cyà ku bintu byà mushinga, n'Diitabuuja. Bantu kabèena nè Diitabuuja leelù ewu bu mwàkadibo naadi mu ditùkù adi amu to. Mukùmbi wà yelèkè wà mùshindù kampàndà, wà mùshindù kampàndà, mmubwelè kàdi kudyà kubùtula nshinga wa Mwoyi wà Diitabuuja. MbaDishintùlùle. Leelù ewu diitabuuja dyàbò didi dishindameena pa èkèleeziyà munène wa—wa dingumba dyà mùshindù kampàndà. Kàdi Yudà wàkatwàmbila, mu Yudà mvensà mwi3. Wàkamba nè:

Bananga, . . . ndi mudifile nè lùkàsà lónsò bwà kunùfundila bwà lupàndù lwètù bónsò, bivwa bikèngediibwa bwà mèmè kunùfundila . . . (Ndi naaCi kaaba aka kumpalà kwànyì.) . . . nè bwà kunùkànkamika bwà nè bivwa bikèngela nwènù kulwangana mvità yà kashèndèndè bwà diitabuuja (kì ndiitabuuja kampàndà to; Diitabuuja adi) dyàkapèèshiibwà bansantu musangu wùmwe cyèndèlèlè. (Aci's civwa mbidimu makùmi àsàtù nè bisàtù kumpalà kwà cyòci eci, Diitabuuja edi kufidiibwa.)

⁷⁹ Mpindyewu, kî . . . Bantu bàdi bàmba nè: “Kaa, Aci's cidi cìbèngangana nè diitabuuja dyànyì.”

Kùdi Diitabuuja ànu òmwèpelè. “Mukalenge umwèpelè, Diitabuuja òmwèpelè, nè Dibàtiiza òmwèpelè.” Udi mufwànyine kwikala nè diitabuuja kampàndà, kàdi tudi baswè Diitabuuja mene adi. *Kulwangana nè mwètù mwónsò*, mbwena kwamba nè: “kukòkangana bwà,” biimanyine kuulu, “kwimanyina kuulu bwà.”

. . . kulwangana nè mwètù mwónsò bwà diitabuuja dyàkafidiibwà kùdi bansantu musangu wùmwe cyèndèlèlè.

⁸⁰ Bààkabìikidiibwa nè mbasantu dîbà kaayi? Pààkajidiibwàbo. Nyumà Mwîmpè wàkabàjidila. Bààkabìikidiibwa nè mbansantu. Mpindyewu Yudà ùdi wàmba nè: mwanèètù wa balùme, mwanààbò nè Yesù mukwà mamwèndè nè: “Ndi muswè bwà nwènù kulwangana kashèndèndè mvità bwà Diitabuuja dyàkafidiibwà kùdi

bansantu musangu wùmwe cyendelèlèlè. Kanùlekedikù Diitabuuja adi dimata nànsha.”

⁸¹ Nè Diitabuuja dyà bansantu kadivwa mu twitabàayi to, kî mmu mângumba to, kî mmu nzùbu yà èkèleeziyà to, kî mmu diswikakana to, kàdi divwa mmu Bwikadi bwà Nzambi udi nè mwoyi. Bàvwa nè Diitabuuja dyà kwondopa babèedi, kwipata baadémons, kwenza bishimà. Milayi minène yònsò yàkenzà Yesù ayi, èkèleeziyà wa kumpalà awu wàkashàala mukwàte ku Cyôci aci. Cìvwa shinga wa Mwoyi.

⁸² Tèelejàayi apa. Tèelejàayi nè ntèma cìndi muswè kunwàmbila eci. Bwikadi bùdi ànukù dîbà dyònsò bwà Nzambi udi nè mwoyi bùdi nshinga wa Mwoyi wà èkèleeziyà kanà yònsò anyi musumbà kanà wònsò wà bantu, Bwikadi bùdi ànukù dîbà dyònsò bwà Nzambi udi nè mwoyi bwà kukumbaja, nè kwenza, nè kwenza maalu, nè kwikala nè mwoyi pàmwe nè bantu mwàkenzàYe ku cibangidilu amu. Piikalà Bwikadi bwà Nzambi udi nè mwoyi bwàkatwàla mpenta nè bukolé, nè bimanyinu, nè maalu à kukèma, butwàle cisàmbà cyùle tètè nè Butumbi bwà Nzambi mu mùshindù wà nè bàakeela mbilà nè kwakula mu myakulu mikwàbò, nè kuya nè kafwila bwà Diitabuuja, tulwanganàayi nè mwètù mwònsò bwà Diitabuuja adi too nè pàatusùulula lufù. Kulwangana nè mwètù mwònsò bwà Bwalu abu. Katwàdyàkudyàku cibàngà to, pa kubala kwà mikàndà to, kwangata tèòlòjì kampàndà mukwàtakaja kùdi bantu to. Katwàdyàkudya cibanga to, pa twitabàayi kampàndà anyi pa mikàndà kampàndà yà disambila, anyi cintu kampàndà cikwàbò cìdi muntu kampàndà mwambè.

Diitabuuja dyànyi kî ndiibakila pa kantu
nànsha kàmwe to
Ànu pa Mashi à Yesù nè bwakànè;
Byònsò bìdi binyùngùlùkile musùùkà wànyi
bìdi byùmuka,
Dîbà adi Yèyè ke dìtèkemena dyànyi dyònsò nè
ciikishilu cyànyi.

Bwalu pa Kilistò, Lubwebwe lushindàme,
mpàndi mwimàne;
Myaba mikwàbò yònsò nduntekà.

⁸³ Katwèna nè twitabàayi to ànu Kilistò, katwèna nè mukenji to ànu dinanga, nè katwèna nè mukàndà to ànu Bible. Kakwèna mikàndà yà twitabàayi to! Bikèngela Bible àmbè cyôci aci. Kabyèna bikèngela ànu bwà Bible kuCyàmbe cyanààna to, kàdi ùCyàmbe musangu wònsò ànu mùshindù wùmwe wùmwe awu, ùdi nè cyà kuCyàmbe kubangila ku Genèsè too nè ku Bwàkabuulwibwà. Cìdi nè cyà kuya mu kasunya kònsò, nè kubwela mu citùpà cyònsò cyà Dîyi. Kabiyi nànkù to, dîbà adi ndi nè dyumvwija dyàCì dibi, bwalu Nzambi kèna mwà kwela

Díyì Dyèndè Yèyè mwinè mpatà to. Dyòdì kadiyì dyàmba cintu cìmwècìmwè aci kùdì kalanjìlanjì kònsò to!

⁸⁴ Piikalà mutèèlu ewu nùnkù, mmuluka nè mândà àmwèámwè, ke cìdì cìwènzà cìdiwu eci. Ke cìdì cìwènzà mutòòke.

⁸⁵ Ke cìdì Èkèleeziyà ncyôci aci. Byôbì nè cyà kwikala Èkèleeziyà mutòòke, mulediibwe cyàkàbìdì, kàyì katòba, kàyì mufudì to, ùdì nè cyà kwikala muluka nè mândà à mùshindù wùmwèwùmwè awu àkatwàdijàye naawù, mu Ditùkù dyà Mpenta, dilabula dyà Nyumà Mwimpè, diikale dilakuka kapyà nè dipeepa. Kwènà mwà kusàkidilakù katùpà kàà cìlambà cibolè to. Kwènà mwà kusàkidilakù kapepe kàà mufuku wà cìkùnyì to. Kabyàkukùmbanakù to. Necicinyangè.

⁸⁶ Kaayelèkè kakesè kàà kale kàà mùshindù kampàndà nkabwelè nè kadyè Diitabuujà adi. Bàdì bàjuukila kuulu bàmba nè: “Ndi ngiitabuujà èkèleeziyà wa cijila. Èkèleeziyà wa cijila wa Kàtòlikè wa cyena Loomò, ndi ngiitabuujamù.”

⁸⁷ Ndi ngiitabuujà Yesù Kilistò, Mwànà wa Nzambì. Ndi ngiitabuujà nè Yèyè ùdì umweumwe awu makèèlèlè, leelù, too nè kashidì, nè Diitabuujà nè Bukolè bwà dibìikà Dyèndè dyà ku lufù bùdì nè mwoyi munda mwànyì leelù ewu. Bwalu Yèyè ùdì nè mwoyi, mèmè pàànyì ndi nè mwoyi. Kí mbwà twitabàayi kampàndà to, kí mbwà dingumba kampàndà to; kàdì mbwalu Kilistò ùdì nè mwoyi. Nè mèmè ndi munda mwà Kilistò, ndi nè mwoyi ku Yèyè, nè pàmwè Nendè, nè ndi nè mwoyi munda Mwèndè. Nè Mwoyi Wèndè ùDilukakaja bu tujilu munda mwànyì. Byôbì kabiya nànkù to, díbà adi ncyènà mwà kudibìikila nè ndi Wèndè nànsha. Yèyè kènà wàngata ànu mutù wànyì to; Ùdì wàngata mwoyi wànyì, dinyungakana dyànyì, bintu byànyì byònsò, nè ùDilukakajamù bu mândà mu cìlambà.

⁸⁸ Ùdì ùDilukakaja mu Díyì. Díyì kadyèna mwà kwamba cintu nànsha cìmwè, mwaba kampàndà, nè cintu cishìilàngàne mwaba mukwàbò ewu to. Nè ndi mumanyè nè nCifùnda mùshindù awu. Ncifùnda mùshindù awu bwà kiipàcìlà kampàndà. Yesù wàkamba nànkù, nè wàkasàkidila Nzambì, bwà nè Yèyè—Yèyè ùvwa “mucìsokòke ku mèsù kwà beena meejì nè badìmùke, kàdì kucibulwila bàna bu aba bàdì baswè kuyiila.” Ke kiipàcìlà kàà Nzambì mu kwenza kwà nànkù. Yèyè . . .

⁸⁹ Bwà cinyì Yèyè wàkalekelakù ngènzàmpèkààtù ùlwa? Bivwa bikèngela bwà kulekelaYè ngènzàmpèkààtù ùlwa, bwà kiipàcìlà kàà Yèyè kwikala Musungidi. Yèyè's mmunène kutàmba mpèkaatù. Yèyè . . . kabivwa bikèngela kwikalaci mpèkaatù to, kabivwa bikèngela bwà kulekelaYè Sàtaanà wènza mpèkaatù wa kumpàlà awu to. Kàdì cyàkafikisha Sàtaanà bwà kufùka mpèkaatù wa kumpàlà, anyì kunyangakaja bwakàne, kubùvwija mpèkaatù, cyàkenzelàye nànkù, mbwà Nzambì wàmòna mwà kwikala Musùngidi. Wàkangishila bwà muntu

cikufikisha ku dipeta bilòòtálòòtà. Wèwè ùtùpika ucibìikila nè ncikèènà-kumòna.

⁹⁷ Kùdi cìkèènà-kumòna cìlèlèlà, cìshùwashùwàlè cyà Nzambi. Cyà bushùwà! Nzambi ngudi mucilayè. “Yesù Kilistò umweumwe awu makèlèlèlà, leelù, too nè kashidi.” Yèyè ùdi wènza nànkù, nè kacitukù cìpangila nànsha. Bible mmwambè nè: “Kwòkò kwikàle muntu munkaci mwènù, udi wa nyumà, anyi mupròfetà, nènku yèyè awu àkulè; nè cidiye wàmba aci, cyòci cyenzèke, díbà adi nùmutèèlejaayi, bwalu Ndi nendè. Kabiyi nànkù to, kanùmutèèleji to, bwalu yèyè mmupròfetà wa mashimi.” Nzambi kèna mwà kushima nànsha. Nzambi ùdi wàmba bulelèlèlà, díbà dyònsò. Bìikalè nànkù. Mpindyewu tudi tusangana nè aci ncilelèlèlà. Kùdi bintu abi bìdi . . .

⁹⁸ Tàngilàayi Pòlò, pàvwà kuntu kwàka dilòòlò adi, ditèkemena dyònsò dimanè kuya, dyabùlù ùseka nè disànka dyònsò, ùkenya ku mènù musangu wònsò wùvwà mavwala àbàndà muulu nè mikenyi yèlè nè: “Nèntùkije mùpostòlò awu muntwamu,” kaamàzuwà kakesè kàà kale aku, kaminè màyi. Nè matùkù nè matùkù, munda mwà matùkù dikùmi nè ànaayi à munya nè à bufùku, mìtootò kayiyikù nànsha yìkenka to; nè mùshindù mwinè wùvwà kaamàzuwà kakesè kàà kale aku katànkakana’s. Yèyè wènda wèndàkana, ùkòka mùnyòòlòlò paanyimà pèndè apu, bwà kuyiisha Èvànjeeliyò. Àlèluuyàh’s wè!

⁹⁹ Kàdi twètù katwèna nànsha mwà kulekela ní nganyì wàkula bwà bwalu bwètù katùyì bataayike bu cyulà munkaci mwà kudyà ntenda. Tutu misangu yònsò ànu twenza maalù à lukutukutu bwà cintu kampàndà. Nè pashìishe twamba nè tudi tulwangana nè mwètù mwònsò bwà Diitabuuja? Branham Tabernacle ùdi nè dikèngela dyà bintu byàbúngi kwanji kuludikiibwabi, dyàmbedi, byà mwomùmwe nè beena Mpenta, nè ba-Baptistes, nè ba-Nazaréens. Ke bwalu kaayi katwèna nè kutùdi tukafika to, katwèna bàà kweyemena nè meeji matòoke nànsha. Twètukù batwilàngàne mpàla nè mpàla nè Cintu aci kuntu kwàka, cìdì cìtùvwija katùyì mwà kunyungishiibwa to, misangu yònsò tudyunda ànu mu Nzambi, Diitabuuja dyàkapèèshiibwà bansantu musangu wùmwe cyendèlèlè.

¹⁰⁰ Hazilà wà kale awu wàkabwela, nè yelèkè, kàdi kucìdya cyònsò. “Matùkù ònsò à bishimà àkaadi mamanè kupita. Kabyèna bikèngela bwà nwènù kwenza *Cikampàndà* to. Kabyèna bikèngela bwà nwènù kwenza *Cikansanga* to.”

¹⁰¹ Piikalàbi nè Nzambi wàkapàtula ditàmbà Dyèndè dyà kumpàlà ku Mwonji wà mvinyò awu, òvwà ditàmbà dyà mpenta, nè bukolè, bikèènà-kumòna, mabuulula, dyondopa, dijidiibwa, Nyumà Mwìmpè, ditàmbà dyàlondà nedìikale cintu cìmwècìmwè aci. Ncyà bushùwà nè ke cìikalàku. Musangu wònsò wìkalà . . . musangu wònsò wìkalà Mwonji wà mvinyò awu mwà kupàtula ditàmbà, nedìikalè menemene ànu bu edi

divwàku kumpàlà adi. Nwênù... Ànu bu mûmvwà mwambe dilòòlò dishààle edi, pâmvwà ngààkula nè kasùmbù kàà bàna bèètù nè: kanwèna mwà kufikisha mwonji wà tumuma twà mvinyò ku dikwàmawù mawòji nànsha. Kwèna mwà kufikisha mwonji wà mawòji ku dikwàmawù tumuma twà mvinyò to. Aci's ncilelèlè. Cyònsò cidì mwoyi mu mwonji wà mvinyò awu aci, wùdi wùcìpàtula.

¹⁰² Nènku pìikalabi nè Kilistò ùdi mu Mwonji wa mvinyò awu, nè Mwoyi wà Kilistò mwikàle mu muntu awu, neyikalè bu Yesù, neàkwamè mamuma Èndè. N'Nyumà Wendè. Kèna mwà kwenza cìngà cintu to ànu kwenza nànkù. Bikèngela àtwalè Mwoyi awu, bwalu m'Mwoyi wùmèwùmwe awu. Kwèna ànu mwà kupàtula cintu cikwàbò nànsha cìmwè to. Nedyènze maalu bu Yèyè. Nedyàkule bu Yèyè. Nedyèndè bu Yèyè. Nedyòndope bu Yèyè. Nedimòne bikèèna-kumòna bu Yèyè. Nedipatulè ànu menemene Mwoyi Wendè, ànu menemene, musangu wònsò, bwalu Didi Mwoyi Wendè.

¹⁰³ Wèwè udi ànu cizubu cyanààna. Muntu ùdi ànu bu mulonda wà màyi. Yèyè kí m'Màyi to; ùdi ànu mulonda cyanààna. Pàtula ànu Màyi munda mwèndè, neàkwatè dimòmà. Èè, ke lutàtù lùdìku leelù ewu ndwòlò alu. Kùdi bààbùngì menemene bàà kutùdi munkaci mwà kukwàta dimòmà, bàvwà kale wàwa benzè dilabula. Lekèlè Màyi àtuute nkòkà, ke cidì cilamà nshinga wa Mwoyi ncyòci aci.

¹⁰⁴ Ngàkuumvwa muntu kampàndà ùyiisha musangu kampàndà, wàmba nè kùvwa ngulube ùdivwànda mu bitoci, ùvwija màyi wònsò bitoci. Cintu citàmbe bwìmpè... Bible ùdi wàkula bwà bwalu abu. Pàtula ànu ngulube awu mu bitoci. Udi upweka lwà kwínshì eku, kasùlu kimpè, nè lwà kwínshì eku mwaba kampàndà kwikàle tusùlu tunène tùpàsàlala, kuulu ku mukùnà kwàka; màyi ònsò àdi nè bitoci, mbitàmbe bwìmpè kupàtulumu ngulube, nànkù ke màyi awu kutòòkeshiibwa.

¹⁰⁵ Kùdi bintu bùngì cyanààna bìdì bikèngelà bwà twètù kupàtula, kumpàlà kwà Màyi kufùmina mu Mpokolo mùle tètè nè Mashi makòka mu mijilu yà Èmanùwèlè, mùdi bangènzàmpèkààtù biinyija mwínshì mwà nkwa awu bàjimija dikeji dyàbò dyònsò dyà dipiilà, dibènga kucyùka dyà myànda nè dyela dyà mbilèlèlè, nè bikwàbò.

¹⁰⁶ Bambi dikùmi nè bàsambòmbò, bwalu bàdi biitabuuja... Bàvwà bèèla meeji nè mvwa mwitàbùùje nè Nzambi ùvwà ùlama Èkèleeziyà Wendè nè ùlaminyina Èkèleeziyà Wendè. Mufùndu mmwambè nè: “Ewu udi utèèleja Dìyì Dyànyì,” kí ng'ewu udi wenza bu nè ùdi ùDitèèleja to. Awu's ke udi Nzambi mutàbèèje mèsù nè mukàngùle macì, bwà kuumvwa. Muntu nànsha umwe kèna mwà kucyenzaku to ànu Nzambi mumutàbèèje mèsù nè mumukàngùle macì. “Ewu udi utèèleja Mèyì Àànyì nè witabuuja Ewu udi muNtùme, ùdi nè Mwoyi wà kashidi, nè

kàadyàkupicilakù ku Cilumbulwidi to, kàdi ùkaadi mumane kuumuka ku lufù muyè ku Mwoyi.” Ncinyi cyàmwenzekelà? Nzambi mmushimè anyi m’Mwambè Bulelèlà?

107 Mmuntu mmubîngè, anyi nè: “Kaa, udi mwà kupeta Nyumà Mwîmpè nè kusungidiibwa, nè määlabà udi mwà kujimina nè kuya mu ifernò” anyi? Kanwîtabuuji kù bintu byà budingidingi abi to. Aci’s mmafi.

108 Paùkàadi ànu mulediibwe cyàkàbìdi, ngiikàdilù webè yònsò nkòong mmulongolola bishiilàngàne. Muntu yèyè ànu mukùnyiiibwe mu Kilistò, nè mukòwòlwèle Mwoyi wà Mwonji wà tumuma twà mvinyò, ùpicila mu yèyè, yèyè kàadyàkukwàmakù kàbìdi mawòji to. Udi mufwànyine kumujiingila òmwè pambidi, kàdi yèyè mmumanyè nè cintu kampàndà ncibi. Yèyè neàshaalè mulàale mwaba awu ùtwa mikèmù too nè mùumushiibwàci kùdiye. Mbujitu bwàbùngi bikolè kùdiye; cidi cìmwinyika pabwipi menemene nè buloba. Yèyè ùdi ùjinga bwà kukola. Kwèna mwà kulamika diwòji ku Mwonji wà tumuma twà mvinyò nànsha.

109 Mònaayi’s. Kaa! “Kulwangana mvità bwà Diitabuuja,” cìvwa cyùmvwija nè, “kulwangana mvità nè mwètù mwònsò.” Kì ng’ànù kulwangana pàtupù to, kàdi, “kulwangana mvità nè mwètù mwònsò,” pankaci pàà Mwoyi nè lufù. Netùtùpikè kuya ku cikwàbò. Udi mwà kushàala ntàntà mule pa aci nànkù.

110 Cintu cidi cilondà citùdi baswè kwamba, ncyà nè, dinanga dyà bwànà bwètù ndimana kudiibwa ku mwonji wà mvinyò. Dinanga dyà bwànà bwètù! Yesù wàkamba nè: “Ku eci bantu bònsò nebàmanyè nè nudi bayiidi Bàanyi, panùdi nè dinanga, muntu bwà mukwèndè.”

111 Èè, mpindyewu twàngatàayi ànu cileejilu. Muntu yèyè kàyi wîtabuuja mùmwè naanyi, nènyè ànu mu disangisha dyèndè àmu nè nènyiishè nendè, nyiisha ànu cidiye wîtabuuja aci, nè kutùngunuka nè kulekela biya ànu nànkù, bwalu ndi mumunangè. Ku mamuma àbò nkunwàbàmanyinà. Bòbò kabàyi bàCìitabuuja to, nè kabàyi nè dinanga dyà bwànà bwètù to, bàdi bàkùluka, bàbènga, bàdishinda nè: “Mémè ncyàkwikala Naaci bwalu to.” Bwà cinyi kwèna ulwa kùndi bwà kuyiikila naanyi pa Bwalu abu? Kwèna mumanyè cindi mémè ngiitabuuja to. Nwamònu anyi? Bidi ne dishiilàngàna kaayi’s, nànsha bishi, bwà cindi mémè ngiitabuuja? Bwalu’s mbwà Ùndi mémè ngiitabuuja: Yesù Kilistò. Kacya ncitukù mwanji kushiya disangisha, too nè leelù, nè mwenya mubi to, ku dyànyi pàanyi dimanya. Kàdi, nudi numòna’s, dinanga dyà bwànà bwètù dikaadi diimansha dyònsò.

112 Nènku Pòlò wàkacimòna, mu Kolintò wa Kumpalà 13, kwambayè nè: “Dinanga dyà bwànà bwètù dìtùngunukè.” Kàdi dinanga dyà bwànà bwètù dyàkumushiibwa. Mpindyewu tàngilàayi. Musangu wònsò. . .

¹¹³ Mpindyewu, tèèlèjààyi nè ntèèmà mpindyewu, tudi tubwela mu byàkudyà bikolè. Musangu wónsò wùdì dyabùlù ùtùùla cintu kampàndà ku mucì, netwǎmbè nè bizubu, cǐshì cìdì cìdya bizubu abi, ùdì ùcìjìngila mukùsù wà kale wà dikwàtakaja dyà bantu, bwà kwangata kaaba kààCì. Jìngilàbi mukùsù ku mushimì wà màyi à mucì, kawàkutùma màyi muulu mu bimuma byà mucì awu to. Kawàdyàkukwàma cimuma nànsha cìmwè to. Neàlukile ànu kwínshì mu buloba. Nènku ke bwà cinyì, leelù ewu, katwèna mwà kupeta ditàbuluja mu ditùkù dyètù edi to, bìdì ànu dīyì diswika dikwàtakaja kùdì bantu dipìte búngì. Nshinga wa Mwoyi kadyàkwendela pa mukùsù wà kale awu to. Newùmacishè màyi, Mwoyi newùmatè dyàkàmwè ùya mu buloba. Ke bwà cinyì matàbuluja ètù àdì àpàngila.

¹¹⁴ Ànu mwàkamba Billy Graham ditùkù adi nè, ùvwa mu Angleterre, mùvwàye mwénzè ditàbuluja dinène. Pa mwaba mene wùvwàye ùyiishila, byàkamukèngela bwà kuumushayè mukàjèndè mu lupangu amu bwalu balùme nè bakàjì bàvwa bèndela masandi ànu pambèlu mu mpangu amu. Bwalu bùvwa cinyì? Bikùsukusu bikwàtakaja kùdì bantu pamutù pàà cizubu citòlwesha kùdì Nzambi. Abi kabyàkutwàlakù Mwoyi nànsha.

¹¹⁵ Èkèleeziyà udi mujìngila ku twitabàayi kampàndà mukwàtakaja kùdì bantu, kàakutùma Bukolè bwà Nzambi mu matàmbà to. Neǎmbè nè: “Matùkù à bishimà àkaadi mamanè kupita,” nè ùCìmacisha panshì. Amen. Ndi mumanyè nè nudi nwela meeji nè ndi mupàle; kàdi, byòbì nànkù, ndekèlaayi, ndi ndyùmvwa bimpè mùshindù ewu. Nwamònu anyi? Necìmacishè Dīyì dyà Nzambi.

¹¹⁶ Nzambi Yèyè wàmba kaaba aka nè: “Mémè ndi Mukalenge. Kacya ncitukù nshintuluka nànsha.”

¹¹⁷ “Èè, Yèyè mmushintùlùke mu ditùkù edi,” mùdì mukùsù awu wàmba. ÙCìmacisha panshì. Mwaba wàkabangàci dyàmbedi wùvwa mmu cikondo cyà ku cibangidilu, pàvwàbo kabàyi nè màngumba to, kàdi muntu mmuteetè bwà kwalujulula bwànà bwètù ku màngumba. Dinanga dyà bwànà bwètù ndyumusha bwà màngumba.

¹¹⁸ Ndeejàayikù cikondo kampàndà cìkaadiku Nzambi mupetè bulongolodi anyi dīngumba kampàndà, nè kacya mubwejè Èkèleeziyà Wendè mu dīngumba, anyi mene dīngumba kampàndà dikaatùku dijuukè kacya kadiyì didishinde nè kadiyì dijuukè kàbidì. Mpindyewu, ndi munkaci mwà kubala kacya ànu ngàfùma kuntwaku, pa cyena-bwalu ciinè eci. Ntu mubalè *Mukàndà Wà Fox Wà Bafwile Dìtabuuja*. Ntu mubalè mifundù yà ku cibangidilu yà Josèphe. Ntu mubalè mukàndà wà *Baabùlònà Yìbìdì* wà Hislop. Ndi mubalè *Bikondo byà ku Cibangidilu* wà Pember, kaa, nè *Baataatù bàà ku Nicée*, nè kumpàlà menemene kwà Nsangilu wa Nicée, paanyimà pàà Mpenta. Nè kakùtu kacya dīngumba ditù Nzambi mulongòlòle

mu Bible to. Dìbà adi patwàkalongolola nè kwenza màngumba, twàkapàtuka mu diswa dyà Nzambi.

¹¹⁹ Yelèkè, udi ùbìikidiibwa nè “dìngumba,” wàkadyà kubùtula cizubu cyà ku cibangidilu cyà dinanga dyà bwànà bwètù, nè kudivwija dìngumba, ku ditwàla mukùsù nè kuwùjìngilakù. Nè Mwoyi wà Nzambi wùdi wùbàndila mu miji mwab’ewu, Muji nè Mùtòlokù wà Davidi, pààkabangaWu kukola kupicila ku Nyumà Mwimpè; pashìishe dìngumba kwambadi nè: “Matùkù à bishimà àkaadi mamanè kupita. Kabyèna bikèngela bwà nwènù kwakula mu myakulu leelù ewu to. Cintu pààci nè ndibàtiiza dyà Nyumà Mwimpè kacitukù to. Kakùtu dyondopa dyà kùdi Nzambi to. Aci ciwva bwà cikondo cikaadi cipite. Ncimanè kupita, kùkaadi ntàntà mule.” Kàdi matàmbà ngòwò aa apa, àkèngakana, mamuma awu.

¹²⁰ Muci mwimpè, wà dikàndà tumatuma kawèna wùkèngela bwà kuwùpwidijilabò bwanga to. Bwà cinyi tudi tupwidija nè tupwidija ànu kupwidija bwanga, bwà ditàpila dyà twishì? Citùdi tucyènzela ncinyi? Mbwalu mucì awu kawèna nè mubidi tumatuma to. Mbwa cinyi bùdiwu kawùyì nè mubidi tumatuma? Twitabàayi nè màngumba mbidyè nshinga wa Mwoyi ùvwàmu awu. Kakùyì mpata to! Ba-Méthodistes, ba-Baptistes, ba-Presbytériens, beena Mpenta, bàakadyà nshinga wa Mwoyi ku mucì awu, bàteeta kupingajapù dìngumba kampàndà, bwà kubweja bantu bònsò mu cidiidi. Nzambi kí mmuswè bwà twètù kwikala baswikakane pàmwè mu cidiidi nè twitabàayi to. Tudi baswikakaja pàmwè kùdi Nyumà Mwimpè, wa ku cibangidilu wa Nzambi awu, mupàtule mpèkaatù munda mwà mwoyi wètù, nè mutùvwije bònsò umwe mu Kilistò Yesù. Aci’s ncilelèlè, mwanèètù wa balùme. Aci’s ncilelèlè, mwanèètù wa bakàji.

¹²¹ Cyàkabanga mu bikondo byà ku cibangidilu paanyimà pàà lufù lwà Kilistò, nè dibìikà dyà ku lufù, paanyimà pàà lufù lwà bàpostòlò. Paanyimà pàà bidimu nkàmà yìsàtù, kubwejabò Nsangilu wa Nicée. Apu ke pààkenzàbo bulongolodi bwà kumpàla, bùvwà èkèleeziyà wa Kàtòlikè abu. Mbwenà kwamba nè, *kàtòlikè* mbwenà kwamba nè: “wa buloba bujimà.” Mu Kàtòlikè, mu èkèleeziyà awu mmwàkapàtukilà Luther; mu Luther, kupàtukamù Wesley; mu Wesley, kupàtukamù Mpenta. Too nè kwìnshi, tujila tukesè—tukesè twà mu nyùngulwilu, tukwàbò twà tukesè etu, bu mùdi, kaa, ba-Nazaréens, ba-Pèlerin de la Sainteté, nè bakwàbò, ba-Baptistes, nè byònsò abi. Bònsò bwàbò è kupàtukamù, buludi ànu mu ngenzèlù yimwè ayi, dìngumba. Pàdi Nzambi ùpèèsha èkèleeziyà dibènesha, anyi kasumbù kàà bantu, nè lùkàsà lwònsò bàdi bàdyèla mu kaalupangu kakesè, nènku apa’s ke pàdibo bàpetela kààbò kaaba kàà kwimanyina. Nzambi mmuswè kuupula lupangu lwònsò.

¹²² Ndi mvùluka cikondo cingàakayà mu Wesètè dyàmbedi. Bivwa mbikondo byà didima nè tutumbà, mu Kansas, nè bàvwa

bàkùnamù blé. Mvwa mwà kumòna balami bàà ngombe bàà kale abu bàvwà kabàyi bamanyè cintu nànsha cimwè pa bìdi bitàngila katùmbà anyi—anyi ní ncinyi cyònsò, anyi didima dyà blé. Cyònsò cidìbo bamanyè nkudiisha ngombe. Ke twètu kubanga kubweja màshinyi, nè kwenza byalu byà kunàyla golf, nè kuvwàla tùpanù tukesè twà tushìikidile mu binù tùvwàbo bàvwàla bwà kunàya naatù golf atu, nè bintàkanyì byònsò byà mùshindù awu. Mvwa mwà kumòna bantu bàà kale abu nè nsukì mile, mitòoke milembèlèlè mwínshì mwà cifulu cyàbò, pa kubàmòna bàlwa nè biswikì nè bitolweshi byà blé, nè bintàkanyì byà mùshindù awu, ùdi wela dikàsà dyèndè mu cisòmbedi cyà kabalù, nè ùkoka cifulu cyèndè. Kwela mpangu mu mwaba awu; kàvwa mwà kucitwàla to. Kàvwa mumanyè cintu nànsha cimwè pa bìdi bitàngila kwediibwa mu lupangu to. Ûvwa mu cikùmbì amu, nkààyèndè nè Nzambì. Mvya mimulembèlèlè mu cifulu mùshindù awu; udila mwadi, nè binsònji. Ùdi ànu ùcikòka, wàmba nè: “Ncyèna mwà kutwàla bintu ebi to.” Ùdi ùtuuta nyama mikàbà ùya mutàngile kùdì dībà dibwelela.

¹²³ Nzambì àtùkwàcishèku leelù ewu bwà twètù kwikala nè beena lwendu bìikalà kabàyi mwà kutwàla kwikala balamina mu lupangu kùdì dīgumba nè twitabàayi to, nè kwendesha kabalù batàngile kùdì dībà dibwelela; nè Diitabuuja didì kadiyi mwà kunyungushiibwa nànsha, dyàkapèèbwà bansantu musangu wùmwepele bwà kashidi adi; nè dinanga dyà bwànà bwètù didì dishimbula twitabàayi yònsò nè mpangu, nè dyàmba nè: “Tudi bânà bàà muntu. Tudi umwe mu Kilistò Yesù. Cyònsò cidì Nzambì wàmba aci, tudi twamba nè ‘amen’ paanyimà Pààci.” Tùpèèshèku bantu bàà mùshindù awu.

¹²⁴ Èyowà, twitabàayi’s! Pashìishe kwenzabo cidìbo bàbìikila nè—nè baa Taatù bàà Kumpàlà kwà Nicée aci. Kudisangishabò, mu cyòci è kwenzabò nsangilu. Mu nsangilu awu mwàkatooyika èkèleeziyà wa Kàtòlikè, udi umvwija nè “èkèleeziyà wa buloba bujimà,” kusùnsululabò èkèleeziyà mikesè yònsò yà mu nyùngulwilu mùvwà Nzambì ùkwàcila mudimu amu, nè kubènzeja ku bukòlè bwà kubwelabò mu èkèleeziyà ùmwèpelè nè ntèndeleele ùmwèpelè.

¹²⁵ Bàvwa bàtèèka ngombe pa dibòkò dimwè, ngombe pa dikwàbò, kulembejeja nkùrusè kumpàlà kwà muntu, kumwambila nè “mutwè mishiku anyi. . . nè inàmà panshì, bwà kwakidila ntèndèleelelù wa Kàtòlikè,” anyi kusàkabò ngombe umwe mu nùnkù, nè mukwàbò awu mu nàka, kàdì è kumukòka bwà kumupanda bipese. Bàngata mukàjì kampàndà nè bàmutwà nsukì mu ntuku wa kabùdìmbù, nè kumukonka ní ùvwa mwà kwanyisha bwà kutwà nkùrusè ewu mishiku; anyi ùvwa mwà kucyènza, nè kwinamina ntèndèleelelu wa Kàtòlikè, anyi bàvwa bàtwa mudilu ku nsukì ku mutù wèndè nè bàmwosha butubutu. Bàbàtèèka pa cyoshelu nè bikwàbò byònsò. Kubèèla mu cidìbo bàbìikila nè mukàjì wa cyamu cifiike, bàbàbèla tupòmbo

nè milonda ayi, bàteeta bwà kubàfikisha ku ditwà nkùrusè mishiku, bùupukila cidibo bàbiikila nè “ntèndeleeleu wa beena Kilistò,” kàdi kubàvinga kubàshiya ànu lupwishi.

¹²⁶ Mufwile diitabuuja wàkiimana mwaba awu kàyì ùtuuta mupòdi to. Ùvwa mumanyè mwaba wùvwàye mwimànyine. Ùvwa mumanyè nè Nganyì uvwayè mwtàbùùje. Yèyè ùvwa nè bukòlè, mumanyè Cyòci eci nè, Nzambi ùvwa mwà kumubiisha ku lufù ku ditùkù dyà ndekeelu, bwalu Yèyè wàkacilaya. Kumpàlà kwà kwinaminayè ku mukùsu kanà wònsò mukwàtakaja ku byanza byà bantu, wà mishimi yà kale yà manyaanù, mmufwànyine kufwila pa cikuuku. Àlèluuyàh!

¹²⁷ Lekèlaayi mfwilè pa mwaba wùmwèwùmwè ewu. Nzambi wanyì Yèyè kàyì mulwè mu lukòngò lwànyì elu to, nèmfwilè pa cikuuku cìvwà mikùmbi yà yelèkè midyè aci, mwikàle ngiitabuuja nè Yesù Kilistò nè Èkèleeziyà Wendè nè Dìyì Dyèndè bàdi umweumwe awu makèèlèlè, leelù, too nè kashidi. Ndi mufwànyine kwikala ncìyì mukùmbàne bwà kucipàtùla patòòke, mu matàmbà ònsò aa to, bwalu mushimi wà màyi wà kale wùdì mwab'ewu ewu, wà dìngumba nè twitabàayi, ùdi ùnkòsa nè ùndekela pànshì bu cìlungà cyà mudilu. Aci ncìfwànyine kwikala cilelèlè. Kàdi mèmè nèngiìmanè nè lulamatu ku cikuuku nè kwela mbilà, nè: “Dìbà nedìlwe, Nzambi neàlujululè Èkèleeziyà Wendè, too nè mu ngiikàdilù Wendè wa kale.”

¹²⁸ Eci cìdi mwà kutàpangana ku mwoyi. Cintu ciisàtù. Ncyèna muswè bwà citapè to. Tàngilàayi wùmwè wa ku mishimi minène yà màyi yidìbo bakòse ayi. Nè mu cyòci cikondo aci cyà bulongolodi, ke cyòci cyàkakòsà mushimi wà màyi awu, ànu kwìnè kònsò aku. Cyà kumpàlà, bu nè bàvwakù nè dinanga dyà bwànà bwètù munkaci mwàbò kùdì muntu nè mukwèndè, nùnkù kabàvwakù mwà kwikala dìjinga nè bulongolodi to. Nènkù dìbà adi pàakamònàbo nè kabàvwa mwà kwikala nè. . . Kabàvwa nè cyà kupeta dinanga dyà bwànà bwètù, anyì bàvwa bèèla meeji nè kabàvwa naadi to. “Aba bàdi bindila Mukalenge nebàvwijulule makàndà abo mapyàmàpyà.” Pamutù pàà kwangata Dìyì dyà Nzambi, bàvwa nè bulongolodi kampàndà.

¹²⁹ Luther wàkapàtukila mu bòbò bulongolodi abu. Bidimu nkàmà yitaanu nè makumi àtaanu paanyimà, kupàtukayè. Cyàkenzàye ncinyi? Wàkakùdimuka buludì, kwenza cintu cìmwècìmwè cyàkenzàbo aci. Ànu mwòmò amu ke mwàkapàtukilà Calvin. Ànu mwòmò amu ke mwàkapàtukilà Wesley. Ànu mu Wesley ke mwàkapàtukilà ba-Baptistes, ba-Presbytériens, ànu nànkù too nè ku beena Mpenta. Nè beena Mpenta, paanyimà pàà ba-Nazaréens kulwakù beena Mpenta. Nè paanyimà pàà beena Mpenta, ciikalàku ncinyi? Ndi ntèkemena Dilwa dyà Kilistò. Bwalu, beena Mpenta mbenzè cintu cìmwècìmwè cyàkenzà bakwàbò abu aci.

¹³⁰ Bwàkabuulwibwà 12 ùdi wàmba nè bàvwa mwà kucyènza. Yèyè ùvwa mukàjì wa masandi, nè bàvwa bandumbà. Bòbò bàvwa “baandumbà.” Èkèleeziyà wa Kàtòlikè, “mukàjì,” mbambè nè yèyè ùvwa “mukàjì wa masandi,” mu Bible, m-u-k-à-j-i w-a-m-a-s-a-n-d-i. Kolintò wa Kumpàlà 12 ngudi mwambè nànkù. Ke yèyè nè: “bànà bèndè bàà bakàjì.” Mpindyewu, kabèèna mwà kwikala bantu balùme to. Yèyè kààkambakù nè “bànà bèndè bàà balùme to.” Yèyè nè: “bànà bèndè bàà bakàjì.” Èkèleeziyà mmileejìibwe mu Bible bu bakàjì. Nè bànà bèndè bàà bakàjì bàvwa bandumbà, nwamònu’s, cintu cìmwècìmwè aci. Wa mùshindù kaayì? Èè, mmunyi, ndumbà? Biikàle bènda masandi à mu nyumà bibengangana nè Dìyì dyà Nzambì. Kacya bààkwàta ku mukùsù wà cyena màngumba pamutù pàà kwimana tèndee nè mwoyi mujimà bwà Diitabuuja dyàkafidiibwà musangu wùmwèpelè bwà kashidi kùdì bansantu, Dìdì dyàmba, pamutù pàà kwalukila nè kwangata Dìyì dyà Nzambì.

¹³¹ Mwà muiyikile nè nsaserdòsè kampàndà mwaba ewu ànu àbìdì àdì panshi aa. Yèyè nè: “Cìdì Bible wàmba nànsha ciikàle cinyì. Twètù’s ke èkèleeziyà.”

Mèmè nè: “Aci’s n’Dìyì dyà Nzambì.”

Yèyè nè: “Tudi bacyènzè.”

¹³² Mèmè nè: “Mbà cinyì ncifwànyine kushintuluka bikolè nùnkù? Kanwenà nè cintu nànsha cìmwè mu èkèleeziyà wenù, cìdì Bible ewu wàmba, cinùdì nulongesha to.” Mwà mmwambila nè mwà mubàtìize mwànà wa bakàjì kampàndà mu Dìnà dyà Yesù Kilistò.

Yèyè nè: “Udi mumanyè’s, èkèleeziyà wa Kàtòlikè ùvwa kale wàwa nè ciibidilu cyà kwenza nànkù.”

Mèmè nè: “Dìbà kaayì adi’s? Kùdì bwalu-bulonda bwònsò bwà màèkèleeziyà, bùndiku mumanyè, bùsanganyibwa ànu mwaba awu.”

Yèyè nè: “Tudi twitabuuja kàtèshismù kètù.”

Mèmè nè: “Kàdì bìshi bwà maalu-malonda?”

¹³³ Yèyè nè: “Katwèna tucyùka cìdì maalu-malonda mambè to. Tudi twitabuuja kàtèshismù.”

¹³⁴ Mèmè nè: “Mmunyi mùdì umanya nè kùvwa George Washington nè Abraham Lincoln? Wàmanyi munyi nè kùvwa baataatù beena lwendu?”

“Bwalu tudi twitabuuja bwalu bulonda bwètù.”

¹³⁵ Mèmè nè: “Kakwèna mwaba nànsha wùmwè wùkaadiku èkèleeziyà wa Kàtòlikè muvwijìibwe bulongolodi to too nè ku bidimu nkàmà yìsàtù nè makùmi àsambòmbò paanyimà pàà lufù lwà mùpostòlò wa ndekeelu.” Mèmè nè: “Nè èkèleeziyà wa Kàtòlikè kàvwa mumanyike to. Kabààkabàtiiza mu Dìnà dyà Yesù Kilistò to, bwalu bòbò ke bàvwa cishimikidi cyà kumpàlà

menemene cyà kubweja kwà dibàtiiza dyà mashimi. Nè yêyè ùdi. . .”

¹³⁶ Yêyè nè: “Èè, mpindyewu anjì indilà kakesè.” Yêyè nè: “Twètù tudi nè bukenji. Twètù ke èkèleeziyà awu. Tudi twenza citùdi baswè kwenza aci bwalu Nzambi ùdi mu èkèleeziyà Wendè.”

Mèmè nè: “Nzambi ùdi mu Dîyì Dyèndè, kî mmu èkèleeziyà Wendè to.”

¹³⁷ Èkèleeziyà yêyè ùbèngangana nè Dîyì, dîbà adi kùdi cintu kaciyi mu cyôci. “Dîyì Dyànyì diikalè dilelèlè, nè dîyì dyà muntu mukwàbò yònsò diikalè mashimi.” Ncyà bushùwà. Dîyì dyà Nzambi diikalè dilelèlè. Kuvwija Dîyì Dyèndè dilelèlè. Alùkilaayi ku Dîyì Dyèndè. Nudi numòna cyàkadyàbo kùdi mukùmbì wà yelèkè anyi?

¹³⁸ Mpindyewu, munkaci mwà cikondo cyà baataatù bàà Nicée bàà ku mbangidilu. Gene, wêwè's udi ufuma kudicibala, wêwè pèèbè. Nsangilu munène wa ku Nicée wàkatwàla dikòkangana dinène, pa bwalu bwà nè: “Kùvwa Nzambi umwèpelè anyi kùvwa Nzambi yisàtù; Taatù, mwikàle umwe; Mwànà, mwikàle bàbidi; Nzambi Nyumà Mwimpè, biikàle bàsàtù anyi?” Nè bàakiitaba cyôci aci nè kùvwa “Nzambi yisàtù.” Mpindyewu, wêwè kùyì witabuuja aci to, nènukabadileci mpindyewu mene mu Nsangilu wa Nicée, Baataatù bàà ku Nicée. Bàakacyèna nànkù nè: “Nzambi yisàtù.”

¹³⁹ Kùdi Nzambi umwèpelè. Kùdi ànu Umwèpelè. Yêyè ùdi Yehowàh Nzambi, NDI MUNÈNE awu; Alpha, Omega; Cibangidilu nè Ndekeelu.

¹⁴⁰ Bàkaadi mpindyewu, bwà kwenzabò nànkù, byàkakèngela bwà kupetabò cintu kampàndà cyà kwenda naaci. Bwà kwenza nànkù, bàakateeta kwamba nè: “Nzambi Taatù, Nzambi Mwànà, Nzambi Nyumà Mwimpè.” Mpindyewu, kakùyì mpatà to, cintu bu nànkù kacitukù to. Kî n'Nzambi yisàtù to. Aci's mbumpanganù.

Kùdi midimu yisàtù yà Nzambi umweumwe awu. Buutaatù. . .

¹⁴¹ Pàvwà Nzambi musòmbe nkààyèndè, wa cijila; Mikenji Yèndè, bwakànè Bwèndè bùdi bùMuvwija wa cijila. Ûvwa muswè kwikala mu muntu. Ûvwa muswè kukuukwila nè muntu. Ûvwa muswè bwà muntu kuMukuukwilaYè. Bivwa bikèngela bwà kulwaYè kùdi muntu. Nè pashiishe pààkenzàYè nànkù, kufùkaYè; kubwikilayè virgò mutekète nè mundidimbì dinà dyèndè Màriyà. Nzambi, Yehowàh kwenzaYè nànkù awu, nè wàkafùka kabùlù kàà mashi munda mwèndè, Kabùlù kàà Mashi. Kabùlù kàà Mashi aku kàakavudija tubùlù twà mashi, nè kutwàlakù Muntu, uvwa Kilistò Yesù awu.

¹⁴² Nzambi wa Bukolè bwónsò, Taatù awu, wàkasòmbela munda Mwèndè. Mu ditùkù dyà dibàtiiza, pààkapetàYe Nyumà Mwimpè mu ditùkù dyàkaMubàtiiza Yone adi, Yone kwambayè nè: “Ngàkatàngila nè kumòna Nyumà wa Nzambi, bu Nkuci, ùpweka ùfùmina mu Dyulu, nè Dîyi dyàmba nè: ‘Ewu ke Mwan’Ànyì munanga Mwenà munda Mùndi nsànka bwà kusòmbela.’” Yesù wàkamba nè Nzambi ùvwa Nendè: “Mèmè nè Taatù Wanyì tudi Umwe. Taatù Wanyì mmusòmbèle munda Mwànyì.” Kí n’Yesù to, nè mwikàle umwe nè Nzambi; kàdi Nzambi ùvwa munda mwà Kilistò, ùpungisha bàà pa buloba nè Yèyè mwinè.

¹⁴³ Nènku nwènu bàna bèètù ba-Unitaires, bààbùngi bàà kunùdi bàdi bàpàtuka mu njila mubì panùdi nuteeta kwela meeji nè Nzambi ùdi umwe ànu mùdi munu wèbè wùmwe amu. Yèyè kèna mwà kwikala Tatw’Èndè Sungasunga nànsha. Kèna mwà kwikala nànkù to.

¹⁴⁴ Kàdi Yèyè ùdi Nzambi. Nzambi ùdi Yèhowàh, Nyumà awu; Kilistò nguvwa nzùbu uvwaYè musòmbèlemù. Ke díbà adi kufilaYè mwoyi ewu, nè, pààkenzàYe nànkù, kukùùlaYè Mwoyi. Nè kupicila mu Mashi àvwà kâyi masopakaja àkeelàYe panshi awu, Yèyè wàkanjidila mèmè, bwà Wàmòna mwà kulwa Yèyè mwinè bwà kusòmbela munda mwànyì nè munda mwènu. Nè Nzambi ùdi neetù. Ke Nyumà Mwimpè nyàwù, udi umweumwe awu, Nzambi ànu umweumwe awu, Yèhowàh Nzambi. “Nèngiikalè neenù, munda mwènu mene, too nè ku ndekeelu kwà buloba. Nè bintu bìNdi ngèza, nenùbyènzè pèènu.”

¹⁴⁵ Ke mwaba wàkabangilà mukùmbi wà hazilà kudiila awu, nè yelèkè ayi, ùteeta bwà kuvwija “Nzambi Taatù” musòmbè mu Butumbi, “Nzambi Mwàna” musòmbè lwà ku dyàbalùmè kampàndà didiYe naadi.

¹⁴⁶ Dyàbalùmè dyà Nzambi, mùdi Bible mwambè: “Mèmè kutàngila muulu è kumòna Yesù mwimàne ku dyàbalùmè dyà Nzambi,” Filipò, anyì Stèfanò pààkaashiiwbwaye mabwe apu. Kí mbwena kwamba nè Nzambi ùdi nè cyanza cyà dyàbalùmè, nè Yesù mmwimàne pampàla pà cyanza Cyèndè cyà dyàbalùmè to. Mbwena kwamba nè Yèyè ùdi mu cyanza cyà dyàbalùmè cyà Bukolè, bukòòkeshi. “Makòòkeshi ònsò mu Maulu nè pa buloba mmaMpèèsha,” mwàkambà Yesù. Yèyè ùvwa mu bukòòkeshi. Nzambi ùvwa munda mwà Kilistò. Ùdi munda—munda Mwèndè. Bible mmwambè nè: “Munda Mwèndè mmùdi musòmbèle kaabujimà kàà Bunzambi mu mùshindù wà mubidi.” Paùdi uteeta kwenza Nzambi yisàtù yà pàà nkààyà, udi mumpàngaanù ànu mùdi mumpàngaanù yònsò ewu.

¹⁴⁷ Mpindyewu, eci necisaamè ku mwoyi. Ciinâyì. Pàvwàbo nè nzambi yisàtù, bìvwa bikèngela bwà kuleejabò dibàtiiza bwèndè yèyè, bwà nzambi yàbò yisàtù ayi, nànkù ke dyabùlù

kubàfofomijayè mèsù, mu Maatàayi 28.19 nè: “Ndàayaaku, nùkalongèshè bàà mu matùnga ònsò, nubàtiiza mu Dìnà dyà Taatù, Mwànà, Nyumà Mwímpè. Nubalongèshè bwà kwenzabo cyònsò cìndi mwenze aci. Mònaayi, Ndi neenù misangu yònsò, too nè ku ndekeelu kwà buloba.” Dyabùlù ngwàkabàfofomija mèsù ku Cyòci aci.

¹⁴⁸ Mpindyewu kwàtaayi aci. Mpindyewu mwaba ngwòwò ewu wùndi nè cyà kupoopela musonso, nènku nebisaamèku, kàdi ndi muswè nùtèèlejè. M’Bulelèlè. Nzambi àkwacishèku bwà bìikalè... Kenkètaayi ànu Mifundu. Jandùlaayi mu Bible mwaba wùkaadiku muntu mubàtìijìibwe mu Dìnà dyà “Taatu, Mwànà, Nyumà Mwímpè,” nujandùlàyikù mwaba wùmwèpelè wùkaadiku muntu kacya mubàtìijìibwe. Tàngilà, wèwè udi wamba nè: “Dyabùlù ùdi mwà...” Dyabùlù ùdi wàngata Mufundu awu nè ùWùvwija bu cintu kampàndà cìdìWù kawùyì to.

¹⁴⁹ Yèyè kàakambakù cintu cìmwècìmwè aci kùdì Yesù anyì? “Bààkafùnda nè: ‘Yèyè neàtuminè Banjèlò Bèndè dīyì, bwà bwalu abu, bwà nè musangu nànsha wùmwè Kùtuuci dikàsà Dyèbè ku dibwe to.’” Yèyè kàakazaazakù dikàsà Dyèndè ku dibwe to. Kàdi dyabùlù ùvwa ùteeta kuMufikisha ku dimòna cintu kampàndà cìvwa Mifundu kayìyì myambè to.

¹⁵⁰ Ùvwa nè meeji matwè. Ùvwa mùle tètè nè Nzambi. Nzambi ùvwa munda Mwèndè. Nènku Nzambi, mwikàle munda mwà muntu, neàmanyishè dibuulula Dyèndè. Cyà bushùwà.

¹⁵¹ Nènye neenù mu Maatàayi 28.19: “Ndàayaaku, nùkalongèshè bàà mu matùnga ònsò, nubàbàtiiza mu Dìnà dyà Taatù, Mwànà, nè Nyumà Mwímpè.”

¹⁵² Mpindyewu tàngilàayi mùshindù wùdì beena nè ànu búsàtù bàà mu èkèleeziyà wa Kàtòlikè... Kacya kabùvwakù mu Bible nànsha, kacya kakùvwakù ku twìtabàayi wa baataatù bàà kumpàlà kwà Nicée, baataatù bàà kumpàlà—bàà kumpàlà kwà Nicée to. Bàvwa, muntu nè muntu, babàtìijìibwe mu Dìnà dyà Yesù Kilistò, muntu nè muntu wùdìbo. Ncilwile mu èkèleeziyà wa Kàtòlikè, ncifùmìne kwòkù aku cibwelè mu èkèleeziyà wa Mishòònyì.

¹⁵³ Mpindyewu, mmunyi mùdì mwà kucimòna Nzambi kàyì mutàbèèja dīsù dyèbè? Kwèna mwà kucyènza to. Ndi ndòmba bwà Nzambi àtàbeejèku mèsù èbè ku Cyòci eci. Kàdi tèelejàayi ànu nè ntèmà yònsò mpindyewu.

¹⁵⁴ Mpindyewu nêngàngatè Mufundù wèbè, Maatàayi 28.19 nè: “Ndàayi, nùkalongèshè bàà mu matùnga ònsò, nubàbàtiiza mu Dìnà dyà Taatù, Mwànà, Nyumà Mwímpè.”

Nwàkabàtìijìibwa mùshindù kaayi: “Mu dìnà dyà Taatù, mu dìnà dyà Mwànà, mu dìnà dyà Nyumà Mwímpè”? Aci kacýèna nànsha mene cìfùnda mu Mifundu to. Nènku ndi muswè bwà muntu kampàndà...

155 Wêwè udi wamba nè: “Bùsàtù bunsantu bubènèshùibwe.” Mpetèlaayikù mwàkù “bùsàtù” mwaba kanà wònsò mu mabèjì à Bible wa Nzambi. Ncintu cikwàtakaja ku byanza kùdì muntu, mmukùsù wà kale wà manyaanù wà èkèleeziyà mujingilakù, bwà kwangata kaaba kàà Nshinga wà màyi àà Nyumà Mwímpè wa Nzambi. Cintu bu nànkù kacitukù to. Cintu bu nànkù kacitukù to. Wêwè ucipetè kàdi ulwe kùndì. Udi mwenzèjìibwe bwà kucyènzà, bu mwena Kilistò, wêwè mucipetè. Kacyèna mu Mifùndù yà Cijila yà Nzambi to. Nènkù “Taàtù, Mwànà, nè Nyumà Mwímpè” ncitooyishila mu ifèrnò, cintu pààci nè n’Nzambi yisàtù kacitukù to.

156 Mpindyewu, mémè ndi ngiitabuuja Buutaatù bwà Nzambi. Ndi ngiitabuuja Buumwànà bwà Nzambi. Mémè ndi ngiitabuuja cipungu cyà Nyumà Mwímpè cyà Nzambi. Kàdi N’Nzambi umweumwe awu mu cipungu cyònsò, kî n’Nzambi yisàtù to.

157 Mpindyewu: “Mu Dîna dyà Taatù.” Bible kî mmwambè nè: “Ndàayi nukabàtiizè mu dîna dyà Taatù, dîna dyà Mwànà, dîna dyà Nyumà Mwímpè” to. Mmwambè nè: “Ndàayi nukabàtiizè,” mwàkambà Yesù, nutàngilè paanyimà nè, “Dîna dyà Taatù, Mwànà, nè Nyumà Mwímpè.” Kî nnè “dîna dyà Taatù, dîna dyà Mwànà” to, aci ncifwànyine kubàvwija bantu nkàaya, kàdi Kabyèna nànkù to. “Mu Dîna dyà Taatù, nè...” Nè mmutwàngaji, nè cyena-bwalu cyàbò cimwècimwè aci. “Mu Dîna dyà Taatù, nè dyà Mwànà, nè dyà Nyumà Mwímpè.” Kî nnè “mu dîna dyà Taatù, dîna dyà Mwànà, dîna dyà Nyumà Mwímpè to”. Kàdi: “Mu Dîna dyà Taatù, Mwànà, nè Nyumà Mwímpè.” Nwamònu anyi? Mpindyewu tàngilàayaaku.

158 Ke bàpostòlò balaaba maanyì aba biimàne bàya batàngile ku Mpenta, bwà kupeta Nyumà Mwímpè. Bàakaya buludì ku Mpenta nè kupetabò Nyumà Mwímpè. Mpindyewu, Èkèleeziyà mmubanjija, netwènzè cinyi? Cintu cyà kumpalà cidi cipàtuka, Dibèjì dyà bwanga didi nè cyà kufùndiibwa. Byàkakèngela bwà Ngàngabukà Simona Peetèlò kufùndayè Kabèjì kàà bwanga kàà kumpalà aku, bwalu Yesù wàkamupèèsha kasàlà. “Ndi nkupèèsha nsapì ayi, Peetèlò. Cyònsò cyùdi wêwè uswika aci, Kabèjì kàà bwanga kaùdi ùfùnda pa buloba apa aka, mémè nènkákidilè mu Nzùbu wa disùmbishila bwanga. Fùnda eci, nè Mémè nèncítàbè.”

159 Bààkenza cinyi? Pààkuumvwà bantu mutooyi wònsò ewu pambèlu mùshindù awu, kwambabò nè: “Eci cidi cyùmvwija cinyi?” Bakwàbò, bàakula mu myakulu. Bààkamba nè: “Tudi tuumvwà byenzedi bilenga byà Nzambi.”

160 Cyàkambà Peetèlò ncinyi? “Nyingàlàlaayi, muntu nè muntu wa kunùdi, nè nùbatijìibwè mu Dîna dyà Yesù Kilistò bwà dilekelediibwa dyà mpèkaatù wenù, nènku nenùpetè kupà kwà Nyumà Mwímpè.”

¹⁶¹ Mpindyewu cyàkenzàbo ncinyi? Bàakasàkidila “Taatu, Mwàna, Nyumà Mwîmpè” kaaba aka, udi kàyi ùya mu Kabèjì kàà bwanga awu to. Ncyà bushùwà. Cikwàbò kàbìdì cyàkasàkidilabo ncinyi? “Kabyèna bikèngela bwà wèwè kupàtuka nè kwenza maalu mwàkenzàbo amu to. Kacyèna cìkupèesha disànka nè bukolè, nè dyakula dyà mu myakulu, nè bintu byònsò ebi to. Kabyèna bikèngela bwà wèwè kwikala naabi to. Enza wèwè ànu ditonda dyèbè, ulabulangana ku cyanza.” Aci’s ncikwàbò cintu cyà mulungù cyà dyabulu. Pìikalàci cyàkabènzeja nànk awu pàakangatàbo Bwanga abu, necikwenzèjè mùshindù wùm wèwùm wèwè awu. Angàtà Kabèjì Kèndè kàà bwanga aku ànu mu kòkò menemene.

“Cyàkashiyàbo kùdi ngàzamà, hazilà wàkacìdya.”

¹⁶² Mpindyewu vùlukàayi nè, pìikalàbi nè kacya kakùtukù muntu nànsha umwe mubàtìijìibwe, mu Bible emu, mùshindù mukwàbò kanà wònsò pa kuumusha mu Dìna dyà Yesù Kìlistò, beena Yudà nè bàà Bisàmbà byà bendè, nè bàdì pambèlu nè bikwàbò byònsò, bònsò bìvwa bikèngela bwà kulwàbò kubàtìijìibwa mu Dìna dyà Yesù Kìlistò. Ndi ngèela muntu kanà yònsò kadyòmbò bwà kundeejakù mwaba wùkaadiku muntu nànsha umwe mubàtìijìibwe mu dìnà dyà “Taatu, Mwàna, Nyumà Mwîmpè,” anyi munda mwà bidimu nkàmà yisàtù paanyimà pàà—pàà lufù lwà mùpostòlò wa ndekeelu. Mòna’s, s’mbitòòke kutàmba nè minu yànyi dikùmi yidì kumpàlà kwànyi eyi. Kwèna mwà kucimòna pàdì Nzambi kàyi mukukàngùle mèsù to. Èè, aci, cyòci kaciyi dibuulula dijaalàme to, dìbà adi bwà cinyi Peetèlò, ùvwa nè dibuulula dìm wèdìm wè adi, kwalukila buludì... Matùkù dikùmi paanyimà pàà Yesù mumanè kumwambila nè: “Ndàayi nukabàtìizè mu Dìna dyà Taatu, Mwàna, nè Nyumà Mwîmpè,” Peetèlò kukudimuka buludì, kwamba nè: “Bàtìijìibwàyi mu Dìna dyà Yesù Kìlistò, yònsò wa kunùdì.” Dìbà adi eci cidi nè cyà kwikala dibuulula dìm wèdìm wè dyàkapetàye adi. Kàdi èkèleeziyà wa pambèlu pààpa, nè necìikalè ba-trinitaires, biikàle nè dibuulula dyà mashimi, dìbà adi kabèena bàkwàta mudimu nè Nshinga wa màyi à mu mucì to. Bàakangata mukùsù nè kuwùjingila mwaba awu, nè ùdi munkaci mwà kumacisha Mwoyi wà Nzambi mwaba awu. Necìshipè mubèèdì’s! Kaa, mmu bintu kaayi bikwàbò bitùdì mwà kuyakù, mu twitabàayi yènu nè bikwàbò, cìdici cyènzè’s!

¹⁶³ Lekèlaayi ntòòkeshèku eci kakesè. Ndi muswè bwà nwènu kubwelamù nè kwangata Bibles yènu bwà katanci kakesè cyanààna, pa nànkù netùcìvwijè ànu cipwekèle menemene mu mùshindù wà bàna bàCyùmvwa. Buulùlaayi mu Maatàayi, nshapità wa 1. Nudi nè Maatàayi 28.19. Ndàayi mu Maatàayi, nshapità wa 1, ku mvensà wa 18.

¹⁶⁴ Tàngilàayi kunweku, ndi muswè bwà nwènu kutàngila nè ntèmà, ewu n’Taatu, ku dyàbakàjì dyànyi eku, ewu

m'Mwânà, munkaci, ewu n'Nyumà Mwîmpè, ku dyàbalumè. [Mwanèetù Branham ùdi ùkwàta mudimu nè bintu bisàtù bwà kuleeja—Muf.] Mpindyewu, Taatù wa Yesù Kilistò Nganyi? Nzambi, Taatù awu. Ncyà bushùwà anyi? Nwènù bônso nudi nwitabuuja nànkù anyi? [Disangisha didi dyàmba nè: "Amen."] Ncyà bushùwà nè ndi ngiitabuuja. Nzambi, Taatù, n'Taatù wa Mukalenge Yesù. Taatù, Mwânà, Nyumà Mwîmpè.

¹⁶⁵ Mpindyewu ndi ntèlèlè Mufundu. Tàngilàayi, nudi mwà kuwùtàngila panwàlukilà kumbèlu, anyi kuwùtàngila mpindyewu. "Mpindyewu dilediibwa dyà Yesù Kilistò dyàkenzeka mùshindù ewu..." Maatàayi 1. Tàngilàayi kunweku, ànu múnkaadiku mwambè misangu yàbùngi, wèwè ubala mukàndà wà maalu-malonda, nè ùbala lwà paanyimà apu, angàta ànu Maatàayi 28.19 mùshindù ewu, mu mukàndà wà bwalu-bulonda nè: "John nè Marie bàvwa nè nsòmbelu wa disànka pashìishe." John nè Marie mbanganyi? Alùkìlè ku ntwàdijilu kwà mukàndà bwà kujandula nè John nè Marie mbanganyi, bu Yèyè mwambè nè: "Ndàayaaku, nùkalongèshè bàà matùnga ònsò, nubàbàtiiza mu Dìna dyà Taatù."

¹⁶⁶ Ndi muswè nnùkonkèku cintu kampàndà. "Taatù" ndìna anyi? [Disangisha didi dyàmba nè: "To."—Muf.] Ncyà bushùwà nè kì mmwòmò to. Mu Dìna dyà "Mwânà." Kàdi "Mwânà" n'dìna anyi? ["To."] Mmwânzù, ànu bu mùdì "Taatù." Nànkù "Nyumà Mwîmpè" n'dìna anyi? ["To."] To, mmwânzù. *Nyumà Mwîmpè* ncìdìYè.

¹⁶⁷ Wèwè udi wamba nè: "Nyumà Mwîmpè n'dìna." Ke mùdì kàbìdì *muntu*. Nwamònu's, mèmè's ndi muntu, kàdi dìnà dyànyì kì "muntu" to.

¹⁶⁸ Ke cìdìYè ncyòci aci. N'Nyumà Mwîmpè. Kì n'Dìna Dyèndè to; ke cìdìYè ncyòci aci. Dìbà adi pìikalàbì nè "Taatù" kì ndìna to, "Nyumà Mwîmpè" kì ndìna to, nè "Mwânà" kì ndìna to, dìbà adi Dìna dyà "Taatù, Mwânà, Nyumà Mwîmpè" òwà ncyìnyì? [Disangisha didi dyàmba nè: "Mukalenge Yesù Kilistò."—Muf.] Cyà bushùwà's! Cyà bushùwà's! Mpindyewu, nwamònu's: "Taatù" kì ndìna to.

¹⁶⁹ Yesù wàkamba nè: "Ndàayi nukabàbàtiizè mu Dìna dyà Taatù, dyà Mwânà, dyà Nyumà Mwîmpè." Peetèlò kukudimuka, kwamba nè: "N'Dìna dyà 'Yesù Kilistò.'" Mpindyewu, ke mùshindù awu menemene wàkalondàbo mu Bible mujimà.

¹⁷⁰ Mpindyewu cyàkenzàbo ncinyi? Cìdìbo bènzè kùdì bakùdimunyi bààbò, anyi bantu bàà mu èkèleeziyà ncinyi? Ncinyi cìdì malongolodi mènzè? Badìjìngile mukùsù wà kale wà cyena màngumba, bwà kwikala bamanyike nè bakwàbò. Byòbì bìkèngela bwà mèmè kudyà bisùkwita byà mukèlè nè kunwà màyi à ku mulonda, nè kushebeyiibwa bwà diitabuuja, Nèngiimanè bwà Bulelèlè bwà Nzambi nè nèmfwilè pa cikuuku. Ncyà bushùwà. Kakwèna muntu nànsha umwe,

paapà wa ku Loomò, anyi mwèpiskòpò anyi kàrdinalè, udi mwà kukàndameena Cyôci aci to. Èyowà's, mukalenge. Bwalu bùdi cinyi? Cyàkashiyà ngàzamà, cyàkashiyà ba-Méthodistes, ba-Baptistes kucidyabò. Cyàkashiyà ba-Baptistes, beena Mpenta bààkacidya. Mmwaba kaayi—kaayi—kaayi's wè! Nshinga yà mwoyi mmiiyè. Eci cidi ànu cintu cishààdile.

¹⁷¹ Mpindyewu, Nganyì udi “Taatù, Mwànà, Nyumà Mwîmpè?” “Ndààyaaku, nùkalongeshè bàà mu matùnga ônsò, nubàbàtiiza mu Dîná dyà Taatù, Mwànà, Nyumà Mwîmpè.” “Taatù” kî ndîná to, “Mwànà” kî ndîná to, “Nyumà Mwîmpè,” kî ndîná to.

“N'Dîná kaayi dyûdi wamba adi?” Èè, aci's ncyenze ànu bu John nè Marie, twàlukilàayi bwà tûjandulè nè cìvwa ncinyi.

“Mpindyewu dilediibwa dyà Yesù Kilistò dyàkenzeka mùshindù ewu. Pàvwà mamw'Èndè Màriyà mubangila kùdi Yözefù kumpàlà kwà yèyè. . . kumpàlà kwà kushààlabò pàmwè, wàkasanganyiibwa mwimite Difù dyà kùdi” (Cinyi?) “Nyumà Mwîmpè.”

¹⁷² Pàànyì's mvwa ndyàmbedila nè nwambì nè Nzambì nguvwa Tatw'Èndè. Mmuniyì mùdi Nzambì mwà kwikala Tatw'Èndè, nè Nyumà Mwîmpè mwà kwikala Tatw'Èndè? Mpindyewu nudi numòna's, nwènù ba-Trinitaires, kàdi nwela ba-Unitaires mbilà's? Lwesu lwà mishila kalwènakù mwà kwamba mbìdikà wa diipikila kàfè mùdiye mufike nànsha. Tàngilàayi kùnweku, to. Nudi bumvwè cìndi muswè kwamba aci anyi?

¹⁷³ “Taatù.” Wàkamba, nè: “Dilediibwa dyà Yesù Kilistò dyàkenzeka mùshindù ewu. Pàvwà maamù, Màriyà awu, mubangila kùdi Yözefù, kumpàlà kwà kushààlabò pàmwè, wàkasanganyiibwa nè Difù dyà kùdi Nyumà Mwîmpè.” Dìbà adi: “Nzambì Taatù” kàvwa nè cyà dyenzamù to? Pìikalàbi nè—pìikalàbi nè Nzambì Taatù, nè Nzambì Nyumà Mwîmpè, kî m'Mupèrsonà Ùmwèumwè awu to, dìbà adi Yesù's ùvwa nè baataatù bàbìdì, nè Musùngidi wetù ùvwa mwànà mulela mu masandi, mulela nè nyumà yìbìdì mishìilàngàne, anyi, kùdi nyumà yìbìdì mishìilàngàne. “Dilediibwa dyà Yesù Kilistò dyàkadi, Wàkiimiciibwa kùdi Nyumà Mwîmpè.” Nudi nwitabuuja aci anyi? [Disangisha didi dyàmba nè: “Amen.”—Muf.] Dìbà adi Nzambì Taatù, nè Nyumà Mwîmpè, n'Nyumà Umweumwe awu, cyanààna Ùvwa nè baataatù bàbìdì.

¹⁷⁴ “Cyònsò eci cyàkeenjiibwa, cìvwa nè cyà kukùmbaja cìvwa cyakùdiibwe kùdi mupròfetà wa Mukalenge, wàmba nè: ‘Mònaayi, virgò neimite Difù, nè yèyè neàlèlè Mwànà, nè bôbò. . . Mwànà, nè bôbò nebàmwinyikè Dîná Dyèndè” (ewu's n'Yèyè) “YESÙ, udi Èmanùwèlè, udi mwikale, mumvwijìibwe. . .” Cinyi? [Disangisha didi dyàmba nè: “Nzambì neetù.”—Muf.] Dìbà adi Dîná dyà “Taatù, Mwànà, Nyumà Mwîmpè” ncinyi? [“Mukalenge Yesù Kilistò.”] Cyà

bushùwà's. "Dìna Dyèndè nedibìikidiibwè" ["YESÙ,"] "bwalu Yèyè ke wasùngila bantu Bèndè ku mpèkaatù yàbò."

¹⁷⁵ Mpindyewu, "Taatù, Mwànà, Nyumà Mwímpè" ncinyi? Mukalenge Yesù Kilistò. Dìna Dyèndè nganyi? Kí ndìna to... "Taatù" kí ndìna to, "Mwànà" kí ndìna to, "Nyumà Mwímpè" kí ndìna to. Kàdi Yesù Kilistò ùdi "Mukalenge Yesù Kilistò," udi Taatù, Mwànà, Nyumà Mwímpè, midimu yisàtù yà Nzambì mimwènèshìibwe mu mubidi, mu Mupèrsonà ùmwèpelè. Àlèluuyàh! Mwanèètù, aci's m'Bulelèlà. Ndi ngambilamù, Nzambì, nèngìmanè mu Ditùkù dyà Cilumbulwidi pa Cyòci aci.

¹⁷⁶ Cyàkenza yelèkè ncinyi? Mwikàle nè Nzambì Taatù mu Dyulu, Nzambì Mwànà musòmbe *apa* pa nkwasa wa butùmbi, nè Nzambì Mwí- . . . Kabyèna bikèmesha mutùdi katùyi nè kutùdi tufika to!

¹⁷⁷ Nzambì ùdi munda mwènù, ùdi neenù. "Nèngìkalè neenù, munda mwènù mene, too nè ku ndekeelu kwà buloba. Nè bintu bíNdì ngèenza, nenùbyènzè pèenù," kí m'Mupèrsonà mukwàbò to, kàdi Nyumà Mwímpè umweumwe awu, Mupèrsonà ùmwèùmwe awu, Nzambì umweumwe awu. Yesù, Mukalenge Yesù Yèyè mwinè, ùvwa Ntentà uvwa Nzambì musòmbèlemù, bwà kuDimwènesha, bwalu Yèyè ùvwa Nyumà. Ùvwa Nyumà.

¹⁷⁸ Mpindyewu, Yesù kàvwa wa Cyendèlèlèlè to. Nzambì ngwa Cyendèlèlèlè. Yesù mpindyewu ngwa Cyendèlèlèlè bwalu Nzambì mmwangàte Mubidi.

¹⁷⁹ Kùvwa musangu kampàndà, kumpàlà kwà difùkà dyà dyulu nè buloba, mvwa wa Cyendèlèlèlè. Pàakangelelè Nzambì meeji, wàkangelela meeji kumpàlà kwà difùkà dyà buloba, dìnà dyànyi dyàkatèèkiibwa mu Mukàndà wà Mwoyi wà Mwànà wa Mùkòòkò, nènkù's ke mùvwà kàbìdì dyèbè, kumpàlà mene kwà kwikalakù katete kàà lusenga. Mbanganyi bàdi bamanyè nè aci m'Bible? Mbanganyi bàdi bamanyè nè Nzambì wàkafùnda dìnà dyèbè mu Mukàndà wà Mwoyi wà Mwànà wa mùkòòkò kumpàlà kwà difùkà dyà dyulu nè buloba? Dìbà adi, mu ngeelèlù wa meeji wa Nzambì, tuvwa balediibwe dìbà adi mene mu Bukalenge Bwèndè.

¹⁸⁰ Dìngà ditùkù kulwakù mubidi kampàndà ku nsòmbelu wa cijila wa bantu basèlàngàne, taatù wanyi nè maamù. Ke bóbò kundela, kàdi's ke mèmè ulwàlwa ewu, William Branham, muleejìibwe mu mubidi wà musunya. Mpindyewu nudi bammanyè mèmè bu William Branham, muntu kampàndà. Nzambì ùvwa mummanyè bu William Branham, meeji mu mutù Wèndè Yèyè mwinè, nè cyakwidi kampàndà.

¹⁸¹ Dìyi ncinyi? Dìyi mmeeji mapàtula mukana. PààkaakulàYe nè kwamba nè: "Yèyè àlwe," mèmè è kulwa. PàdiYe wàmba nè: "Yèyè àlwe cyàkàbìdì," mèmè nèndwè cyàkàbìdì. Èyowà's, mukalenge. Nè pa nànkù, nudi numòna's, meeji kampàndà; dìyi mmeeji meela patòòke.

¹⁸² Nzambi ùkaadi mumanè kufila Dìyì, cintu cìmwèpelè cìvwà meeji Èndè, nè Yêyè wàkacyàmba patòòke. PàdìYe ùcyàmba patòòke, cìdi cyènzeka. “Kwìkalè,” nè cyàkiikalakù. Ke Nzambi awu, wa bukolè bwònsò, Yèhowàh wa ngulu yònsò, wa bukolè bwònsò. Mpindyewu mMuleejìbwe.

Mpindyewu, bwà kupàtula eci patòòke, bàvwa nè nè cyà kwikala nè dibàtiiza dyà mashimi bwà kwenza cyòci eci.

Nudi numòna’s, ncisokoka. Bàà pa buloba kabèèna bàcìmòna to, nè kacyèna mwà kumwènèka to.

¹⁸³ Mpindyewu tàngilàayi nè ntèmà yònsò, patùcidì nè dībà dikùmbàne bwà—bwà kujikija nè kwenza mulongo wà babèèdì apa. Eyowà. Ndi muleepèshe kupita mùmvwà ngèelela meeji, pa cyòci eci. Indila kakesè mpindyewu, ndi nè cikwàbò cintu cìndì muswè kunwàmbila.

¹⁸⁴ Ki bwà cinyì: “Taàtù, Mwànà, Nyumà Mwímpè” ùdi Nzambi mulelèlè umwèpelè awu. Ùdi nè Dìna òmwèpelè. Dìna Dyèndè n’Yesù Kilistò. Wàkalediibwa Kilistò Mukalenge pààkalediibwàYe. Yêyè, *Kilistò*, mbwena kwamba nè “Mulaaba maanyi.” *Mukalenge* mbwena kwamba nè “mwena-cintu.” Yêyè ùvwa “mwena-cintu” nè “Mukalenge.” Ke pashiishe Nzambi kutùuluka nè kusòmbela munda Mwèndè, cyàkaMuvwijà byònsò Taatù, Mwànà, nè Nyumà Mwímpè; Alpha, Omega, Cibangidilu nè Ndekeelu; Ewu Wàkadikù, Udikù, nè Wálwa Awu; Muji nè Mùtòlokù wà Davidì, byònsò bibìdì Muji nè Mùtòlokù wà Davidì; Mùtootò wà mu Dìndà, wa Kumpàlà nè wa Ndekeelu. N’Yêyè awu. Kaa!

¹⁸⁵ “Cìdì ngàzamà mushiye.” Mmuniyì mùdì mwà kukuukwila paùdì kùyì mumanyè cyùdì ukuukwila? Mmuniyì mùdì mwà kwikala wa nyumà paùdì kùyì nè Nyumà Mwímpè munda mwèbè? Pawìkalà muswikàkànàngàne yònsò nè musùmbà wà twitabàayi yà èkèleeziyà, neyikwenzèjè maalu bu bantu bàà mu èkèleeziyà, nè—nè bantu bàà luumù nè batèndeleezi, nè bintu byà mùshindù awu. Byònsò abi mbyenzedi bìmpè, byà nsòmbelu mulenga.

¹⁸⁶ Kàdi, mwanèètù, bikèngela ùlediibwè cyàkàbìdì ku Nyumà Mwímpè mushùwashùwàlè udi ufùma ku Dìyì dyà Nzambi awu. Nènkù Dìyì dìlelèlè dyà Nzambi, pàdìDi dìbwela munda mwèbè, neDimweneshè Bulelèlè. “Yêyè, Nyumà Mwímpè, Yêyè neàlwe. Neàmfidile Mémè bujaadiki. Yêyè neàmweneshè Bulelèlè. Yêyè neàngatè bintu bìmvwà munùleejè abi, ùleeja bintu bìndì mwambè, nè yêyè neànùleejèbi. Nyumà Mwímpè neànùleejèbi.” CyènzàYe, s’ki Yêyè awu.

¹⁸⁷ Cyàkashiyàbo kùdì ngàzamà, hazilà wàkacìdya. Nè cyàkashiyà beena Kàtòlikè aci, ba-Luthériens bààkacìdya. Nè cyàkadyà ba-Luthériens, cyàkashiyàbo, ba-Méthodistes bàkacìdya. Nè cyàkashiyà ba-Méthodistes, beena Mpenta kucìdyabò. Cìdì nè cyà kwenzekela penyi? Cìnkùtunkùtu

mùyombelè cyònsò cyà mpèkaatù eci, bintu byònsò ebi, malongesha, bikwàbò bintu bitùdi mwà kwamba ebi, kaa, ekèlekèle, dilabulangana dyà ku cyanza, dimyaminangana dyà mâyi.

¹⁸⁸ Nganyì ukààdikù muumvwè bwà dimyaminangana dyà mâyi? Cindeejèku mu Bible. Nganyì ukààdikù muumvwè bwà dipòngolola dyà mâyi? Cindeejàayibi mu Bible. Dibàtiiza didi difùma ku, mwàkù *baptizo*, wùdi wùmvwija nè kwikala “mujiikiibwe nè mubwikila.” Cyà bushùwà. Aci’s m’Bulelèlà bwà Dìyì dyà Nzambi. Kaa, bu tuwìkala nè díbà, tuvwa bafwànyine kutungunuka nè bintu byà mashimi.

¹⁸⁹ Ndi ngamba nùku, nwènù bananga bàànyì. Ntèèlèjaayi. Nèngiìmanè neenù dīngà ditùkù mu Ditùkù dyà Cilumbulwidi. Nebikengelè bwà mème kulumbulula’s. Ncyàkulumbulula bwà twitabàayi kampàndà to. (Pa nànkù nkwaçishèku, Nzambi!) Nèndumbululè bwà Bible. Ke Mukàndà ungàtwà mpàndà awu’s.

¹⁹⁰ Kakwènakù mwaba nànsha wùmvwè mu Bible wùkaadibokù bapetè Nyumà Mwimpè kabàyi nè masaluka to, dyakula dyà mu myakulu, nè mbilà, nè disaamuna dyà Nzambi, nè bipròfetà, nè mamwèneshiibwa. Kacya kabàtukù banji kubànda bwà kulabulangana ku cyanza nè muiyishi awu kàdi kukwàta njila kuya nànsha.

¹⁹¹ Kakwèna mwaba nànsha wùmvwè mu Bible wùkaadibokù bapetè to, wàkabàtijiibwàbu to, pa kuumusha kubàtijiibwa mu Dìna dyà Yesù Kilitò.

¹⁹² Kacya kakùvwakù mwaba nànsha wùmvwè mu Bible wùkaadibokù balongeshe būsàtù to. Cìvwa misangu yònsò ànu “Nzambi umwèpelè.” “Tèèlèjaayi, Èyì Izalèlèlà, Mème ndi Mukalenge Nzambi webè, Nzambi umwèpelè! Kwàkwikala kàbidì nè nzambi mikwàbò kumpàlà Kwànyì to. Mème ndi Mukalenge Nzambi webè.” Kì n’Taatu, nè Mwànà, nè Nyumà Mwimpè to, kàdi “Mème ndi Nzambi!” Kashidi, Yèyè ùdi Nzambi! Yèyè ùvwa misangu yònsò ànu Nzambi. Yèyè neikalè misangu yònsò ànu Nzambi.

¹⁹³ Nènku pàdi dīngumba dikubènga, paùdi ulwa mu disangisha nè ùteeta bwà kuleeja dinanga dyà bwànà bwètù, nànsha nè mǎngumba àbò awu, bwà kuteeta bwà kwambula nè kusungila baùdi mwà kusungila, kubàkòkelamù, kulekela Nzambi àngatè bìdì bishààle abi. Kàdi bwalu udi mwimàne pa Malelèlà à Bible, bàdi bàkwipata. Kacyèna mwà kwikala cīngà cintu to ànu dìyelè dipwekèle dyà dyabùlù, bwà kupangisha bānà bwà kubwelamù bwà kumòna disangisha nè kusungidiibwa. Ncyà bushùwà.

¹⁹⁴ Ke Lubwebwe lushindàme lwà Dìyì dyà Nzambi ndwòlò alu. Nèngàngatè muntu kanà yònsò, díbà kanà dyònsò didìbo baswè adi, nè kuya naabò mu dinanga dyà bwànà bwètù, nènku ndi muswè bwà ùndeejèku cintu cīmwepelè cīndi mwambè cidi kacìyi Bulelèlà bwà mu Bible. Èyowà’s, mukalenge. Ncilelèlà.

Mpindyewu, bwalu udi utwà ku Cyôci aci, udi wipaciibwa. Ndi ntèkemena nè nebiikalè mûshindù awu. Nzambi ngudi mwambè nè nebiikalè mûshindù awu.

¹⁹⁵ BàakaMwenza mûshindù wûmwèwûmwè awu. “Nkwépi Kûdi mupetèle malonga? Mmu cilongelu kaayi mùdi Wèwè mufùmîne? Udi nganyi, Mûfaalèsà anyi Mûsadòkà?” Yèyè ùvwa Mwànà wa Nzambi udi nè mwoyi, Kàakangata luseke lwà nànsha umwe wabò nànsha.

¹⁹⁶ Pa nànkù nkwàcishèku, Nzambi, ndekèlèku mpetà cyumvwilu cîmpè cikûmbàne, ndekèlèku mpetè cishimikidi cikûmbàne, ndekèlèku ngiikalè muntu mukûmbàne, ngiikale Kilistò mukûmbàne, bwà kwimana pàà nkààyani (mémè mwimàne, bikèngela ngiimanè mûshindù awu) nè kwamba Bulelèlà, nè ngiimanè. Eyowà's, mukalenge. Mbipiciibwe nè mémè muyiishè Èvànjeeliyò kùdi bantu bàtaanu, kutàmba kwikala nè mìliyò yìdi yitèeleja. Ndi ngàmba Bulelèlà. Kacya ncitukù mudyè cibàngà to. Mvwa muswè eci, bwalu Nzambi ùkaavwa mungambile bimanyinu binène ebi nè bikwàbò bìdi munkaci mwà kupàtudiibwa, bu dimwèneshiibwa dyà dibikà Dyèndè dyà ku lufù, nè bikwàbò, mbwà Èkèleeziyà. Bantu bàdi bakwàte nè byà luse abu kuntwaku, nè baswikiibwe mu twitabàayi ayi nè bikwàbò, mbapàyamù tètè, bu batwà manga à dibènga kubola.

¹⁹⁷ Nzambi àbèneshè mwoyi wènù. Ncyàkunùshiya mu ngiikàdilù awu to. Mémè nènwàmbilè cidi Nzambi mwàmbè: “Kàdi Mémè nèngààlujululè byònsò bìdi hazilà mudyè, cyònsò cyàkadyàbo kùdi yelèkè, cyònsò cyàkadyàbo kùdi ngàzamà aci. Mémè nèngààlujululè, mùdi Mukalenge wàmba!” Ndi ngambilamù, ndi ngèza cipròfetà eci. Kumpàlà kwà Dilwa dyà Mukalenge, Diitabuuja dilelèlà dyà bàpostòlò, Dilongesha dilelèlà dyà bàpostòlò, Nyumà mulelèlà wa Bible, mulelèlà, Ùdi mu njila Wendè patùdi twakula apa, ùtèeta bwà kuDisebela njila, kukola kupàtuka kàbidi.

¹⁹⁸ Beena Mpenta bàvwà naaci, ku mbangilu. Cyàkenzàbò ncinyi? BàakaCyèla mu kaacijèngù, è kubanga kutwà mènà. Nènkù Yèyè wàkaCikòsa. Aci ncyà bushùwà menemene. Ke kulwaku, pàakatùmà Mukalenge mapà aa, mapà makesè mapwekèlè àdiYe mumpèeshe aa. Bàcidi ànu munkaci mwà kulwa, mbaswè bwà mémè kwikala dipòngoloka dyà mvùla mishiishe ayi; mbacyenzè bulongolodi bupàtùke mu cyôci aci. Mbaswè bwà ndwe kushààla wa mu beena Assemblées.

¹⁹⁹ Ndi mwimàne ànu munkaci mwà ditàmbà dyònsò didi dilembelele kuntu kwàka adi, ànu mwab'ewu ku cikuuku cyà Muci, kàdi kwamba nè: “Eci ke Cishimikidi. Kòsaayi mishimi misùnsùke yà kale eyi, bwà Mwoyi wàmòna mwà kubwela munda mwènù, dibà adi nenùpetè bipròfetà, nenwikalè nè dijingulula, nenwikalè nè Nyumà, nenwikalè nè bukolè.

Nenwikale nè dyalujulula dyà Èkèleeziyà mulelèlè, dîbà dinùdì nwalukila ku Mwonji mulelèlè nè Mwoyi mulelèlè.”

²⁰⁰ Kacyèna mwà kulwila ku mukùsu kampàndà udi uCipwekesha panshi, kàdi kwamba nè: “Cìvwa nditùkù dikwàbò. Nditùkù dikwàbò.” Cìdi ànu cìmwècìmwè aci kashidi. Yèyè ùdi Alpha nè Omega; Cibangidilu nè Ndekeelu. Kakùyì mpatà to. Nebikengelè bwà wèwè kwalukila ku Cishimikidi, bwalu: “Pa lubwebwe elu Nèngiibakilèpu Èkèleeziyà Wanyì, nè biibi byà ifernò kabyèna mwà kuMutàmba bukolè to.”

²⁰¹ Nzambi ànùbènèshè, balundà bàanyì. Ndi mumanyè nè nudi nwela meeji nè ndi ànu nè ndambù wa mutooyi cyanààna, mupàtùke mu bulongàme ndambù, kàdi kabyèna nànkù to. Ndi ngèèla meeji nè ndi mu bulongàme nè Dîyi edi.

²⁰² Nyumà wa—wa Nzambi ùdi kaaba aka, Nyumà umweumwe wàkafùnda Bible awu. Piikalà Nyumà udi mufùnde Bible awu, mwà kwamba nè “amen” musangu wònsò wùdì Mèyi à Bible àkula. Piikalàbi nè, *mwaba awu*, bantu bònsò bàakabàtijiibwa mu Dìna dyà Yesù Kilstò, Nyumà mulelèlè wa Nzambi neàmbe nè: “Amen. Aci’s m’Bulelèlè.” Nè Bible mmwambè nè: “Yesù Kilstò, umweumwe awu makèèlèlè too nè kashidi,” “Nèngiikalè neenù misangu yònsò, munda mwènù mene, too nè ku ndekeelu kwà buloba,” Nyumà mulelèlè wa Nzambi neàmbe nè: “Amen.” Nènku aci cyòci ciikàle Nyumà mulelèlè wa Nzambi, dîbà adi makolè malelèlè nè dimwèneshiibwa dyà Nyumà neàDimwèneshè nè Nyumà mulelèlè ewu. Lumbùlwishaaayi Dîyi dinùdì nutèèleja. Dìlumbùlwishaaayi nè Bible. Tàngilàayi byenzedi Byàdì. Tàngilàayi byenzedi Byàdì.

²⁰³ Kùdikù bantu bàdì kaaba aka bwà kubàtijiibwa, bàvwà kacya kabàyikù bânji kubàtijiibwa, baswè kubàtijiibwa anyi? Ela cyanza cyèbè muulu. Èyo.

²⁰⁴ Kwòkò kakùyì dibàtijiibwa to dîbà adi, èyo, dîbà adi netùsambidilè babèèdì. Kùdikù muntu kaaba aka udi usaama anyi? Elà cyanza cyèbè muulu, wèwè udi muswè bwà bàkusambidilè awu. Mbanganyì mwab’ewu bàdì beenyi munkaci mwètù, nè baswè bwà bàbàsambidilè; Ncyèna mukumanyè to, kàdi’s ndi mwenyi, ncyèna mukumanyè to? Èyo. Babèèdì nè beena ntàtu, ncyèna munumanyè to.

²⁰⁵ Piikalàbi nè Nzambi ùdi Nzambi, piikalàbi nè Yèyè ùdi Nzambi wa Dîyi dîndì nyiisha; Yesù wàkamba nè: “Bintu bîNdi ngèenza nenùbyènzè pèènù.” Ncyà bushùwà anyi? Yesù wàkamba nè: “Bintu bîNdi ngèenza nenùbyènzè pèènù. Nenwènzè byàbùngì bipite ebi, bwalu Ndi nya ku Taatù.” Cìvwa ncinyi? Kukudimuka kuumuka ku Muntu, mubidi kampàndà, kwalukila cyàkàbidi mu Dikunji dyà Kapyà. Pààkatuutakeenà Nendè Pòlò mu njila wa ku Damàsekè, Yèyè ùvwa cinyi? Dikunji dyà Kapyà. Ncyà bushùwà anyi? S’ki cìvwàYe. Yèyè ùdi cinyi leelù ewu? Ncinyi cidiYe mu cìmfwànyì *cyàcya*?

Wêwè udi wamba nè: “Kaa, udi mwà *kwamba* nànkù, Mwanèètù Branham.”

206 Piikalàbi bulelèlèl menemene nè aci mbulelèlèl bwà Nzambi,
piikalàbi nè Cìdi Dikunji dyà Kapyà dimwèdimwè adi, Yesu
Kilistò umweumwe awu, mèmè ngàmba nè Nyumà Wendè
mmùbwelè munda mwànyì, Yèyè neénzè cintu cìmwècìmwè
cyàkènzàYe aci. NeCìpetanganè nè Dìyì dyònsò dyàkambàYe
adi, nànsha twitabàayi yà cyena màngumba myàmbè cinyi.
NeCyàmbè Dìyì Dyèndè. Yèyè wàkaCyàmba.

207 Bupidyà bwàbò kabwàkaMwimanyika to. Twitabàayi yàbò
nè dingumba adi, Yèyè kààkangatakù luseke nànsha lùmwè lwa
ku byòbi abi to. Wàkayiisha Èvànjeeliyò uvwa kàyi musopakaja
uvwaYè mùmvwè kùdì Nzambì. Wàkiimana nkààyèndè. Cya
bushùwà, Wàkiimana nkààyèndè. Ku Kàlvariyo, kakùvwa
nànsha umwe uvwa mwà kwimana ku luseke Lwèndè to. Yèyè
Wàkiimana nkààyèndè.

208 Wêwè nè cyà kufika ku diikala cintu cyà nsongo, neùtwe ku
cyà Nzambi, newimanè nkààyeebè. Ngwêwè! Kí mbàa pa buloba
to, kí ng'èkèleeziyà webè to, kí ndingumba dyèbè adi to. Ngwêwè,
mpankaci pèèbè nè Nzambi. Nànsha ciikàlè cinyi. . .

209 Branham Tabernacle ùdi mwà kwenza cyònsò cidìbo baswè
kwenza aci. Ndi muswè bwà kwitabuujabò Nzambi; ndi muswè
bwà bàlwe naanyi. Kàdi bôbò kabàyi balwè to, mèmè ncyàkudya
naabò cibàngà mu kaacintu kààbò kashàadile aku to. Mèmè
nèntwè ku cyà Nzambi.

210 “Ba-Méthodistes. Newěnzè cinyì, Mwanèètù Branham? Ba—ba-trinitaires bàà cyena Mpenta?” Mvwa mujaadike nè ndi mubàangè. Ndi muyè kùdìbo, nè mutùmìibwe mu Assemblées de Dieu nè mu église de Dieu.

211 “Nènku ba-Unitaires, wêwê ubèngangana nè ba-Unitaires
bwà wabò ngiàmànyìnù wa ‘umwèpelè’ awu, mùshindù awu.”
Èyowà’s, mukalenge. Yesù ùvwà nè Taatù. Yèyè ùvwà Nzambi.
Bòbò bàdi bàbàtiiza mu Dîna dyà “Yesù.” Mèmè ndi mbàtiiza
mu Dîna dyà “Mukalenge Yesù Kilistò.” Kùdi ba-Yesù bààbùngì,
kàdi kùdi Mukalenge Yesù Kilistò ànu umwèpelè. Nwamònu
anyì? Kî mmu Dîna dyà “Yesù” to. Kàdi mu Dîna dyà
“Mukalenge Yesù Kilistò,” aci’s ke Taatù, Mwànà, Nyumà
Mwìmpè.

²¹² *Mukalenge*: “Mukalenge wàkambila Mukalenge Wanyì nè: ‘Sòm̃ba ku dyàbalùme.’” Mwànà, *Yesù*. *Kilistò*, Logos wàkapàtuka mu Nzambì awu, ku cibangidilu. Taatù, Mwànà, nè Nyumà Mwîmpè. Ki bwalu mbwôbu abù’s.

213 Kaa, ndi nè disànkà dyàbûngi bwà bwalu abu! Mwoyi wànyì
 ùdi ànu ùcyònkomoka's! Nè pa kumanya nè Nyumà Wendè,
 Nyumà wàkafùnda Dîyì awu, ùdi ùpetangana nè Dîyì, ùjaadika
 nshinga wa Mwoyi. Ùdi ùbwelamù, ùDìmwènesha. Nzambì ikalè

neenù. N'Yesù Kilistò Mwànà wa Nzambi. Ndi mwambè Bulelèlè pa bìdi bitàngilà Dîyi Dyèndè.

Mpindyewu nwènù, nwènù beena mu tabernacle, ndi nnùsambidila misangu mikwàbò. Tudi pashiishe. Mvwa mupicishe kakesè ndambù, ndi mupicishe dîbà kakesè ndambù. Mvwa mutèkèmène musumbà wà kubàtiiza.

214 Tàngilàayi. Piikalà Nyumà Mwîmpè kaaba aka, netwikalè. . . Yêyè—Yêyè neàkwondòpè. Ndi muswè bwà bantu bàdi beenyi mu biibi byètù abu, bàdi—bàdi bàsaama nè biikàle mu ntàtu. Nènku mpindyewu piikalàbi nè ndi mwambè Bulelèlè pa bìdi bitàngilà Nzambi, nè bantu aba bambè bulelèlè, mûndi nciyi mubàmanyè to, nè bôbò biikàle bàsaama nè biikàle mu ntàtu; Nyumà Mwîmpè Yêyè mushàale ànu umweumwe awu, Yêyè ùdi mwà kunsokolwela. Aci cyôci Nyumà Mwîmpè umweumwe awu, nè nCiswikàkàne nè cikuuku cimwècimwè aci kwînshì *eku* cidi mikumbi yà yelèkè midyè aci, kàdi kùdi cizubu cikesè cidi munkaci mwà kupweka kwînshì *eku*, cidi munkaci mwà kuswikakaja eci pàmwè, necikwatè mudimu ànu mùvwàci cyenzè kwînshì eku.

215 Twitabàayi yà èkèleeziyà neyàmbè nè: “Kaa, aci kî ncîmpè to. Aci's ndubuku. Aci's—aci's ndyabùlù. Aci's ndubuku's.”

216 Bàakamba byà mwomùmwe bwà bwalu Bwèndè. “Piikalàbò bàbiikila Mfùmù wa nzùbu nè ‘Beelèzèbùlà,’ mmunyi mwàtambabo kubiikila bayiidi Bèndè?” Mmwômò. Nànsha nànkù aci kacýèna ànu ciciimanyika to. Cidi ànu ciciidyundisha, cicitungunuja.

217 Mpindyewu, Yêyè ùcidi ànu Nzambi anyi? Yêyè ùdi umweumwe awu makèlèlèlè, leelù, too nè kashidi anyi? Ùdi ùtwa Dîyi Dyèndè musinga anyi? Ùdi ùditwa musinga.

218 Nènku ndi ngènzeja yònsò wa kunùdi, pawikalà kacya kùtukù mwànji kubàtijiibwa mu Dîná dyà Yesù Kilistò to, bàtijiibwà mu Dîná dyà Yesù Kilistò. Cidi èkèleeziyà wa kale musùnsuke awu wàmba nànsha ciikàle cinyi. Aci's ndingu- . . .

219 Nè ndi mumanyè bantu bàmvwà mutwàle mu bìrò byànyì, nè mulongè. Mu nyùngulwilu wa bantu bîmpè, mvwa mwà kwamba nè: “Lwàyi bwà katanci kakesè. Ndeejàaku wêwè mwaba wùvwà mubàtijiibwe mu dîná dyà ‘Taatù, Mwànà, Nyumà Mwîmpè,’ piikalàbi nè aci ncyà mu Mifundu.”

220 Nè dîbà dîdiye mufinyina panshì, wàmba nè: “Ndi mumanyè cyôci eci, Mwanètù Branham, kàdi kùngeedì patòòke to.” Nwamònu anyi?

221 Mémè nè: “Twàku dilongesha dyèbè nyama ku mikòlò, ndeejàaku mwaba wùdi wùmwèpelè. Bantu bònsò mu Bible, bôbò. . .”

222 Bàmwe bàbàtiiza, kabiyi nànsha mu dîná òmwè to nànsha kakesè, bivwa bikèngela bwà kulwabò nè kubàtijiibwabò

cyàkàbìdì, kumpàlà kwà kupetabò Nyumà Mwîmpè. Mbanganyi bàdì bamanyè nànkù awu? Pòlò wàkàpicila ku nseke mitùmbùkè yà Efèsò, kusanganayè ba-Baptistes. Bàvwa nè mwîmpè... Bàvwa nè mpaasàtá mwîmpè. Yèyè ùvwa mwakwidyanganyi mukùdimùne mucima, Apòlò. Ke yèyè kubàmbila nè: “Nwakapeta Nyumà Mwîmpè kacya nwítàbuuja anyi?”

223 Bòbò nè: “Katwèna bamanyè nè kùtùkù mene Nyumà Mwîmpè kampànda to.”

224 Yèyè nè: “Kàdì nwàkabàtìijibwa mùshindù kaayi?” Mbàmbè mu Roi Jacques nè: “mu cinyi.” Nùcìbalàayi mu nkùdimwinu wa ntwàdijilu, cìdì cyàmba nè “mmunyi.” “Mu cinyi” cìdì cyùmvwija cintu cìmwècìmwè aci. “Nwàkabàtìijibwa munyi?”

225 Bòbò nè: “Twètù’s tudi babàtìijibwe kùdì Yone, muntu umweumwe wàkabàtìiiza Yesù awu.” Adi’s ndibàtìiiza dîmpè. “Wàkapàtuka mu màyi, yèyè umweumwe wàkabàtìiiza... Yone’s.”

226 Èè, Pòlò kwambayè nè: “Aci kacyakukùmbanaku kàbìdì to. Aci kaciyèna kàbìdì nè dikwàcisha to. Yèyè ùkaadi mumanè kulwa, mupoodiibwe pa nkùrusè. Bwalu Yone wàkabàtìiiza bwà kanyinganyinga, kacivwa bwà dilekelediibwa dyà mpèkaatù to, wàmba nè bìvwa bikèngela bwà nwènù kwitabuuja Ewu udi ulwa, Yesù Kilistò.” Nènku pàakumvwàbo cyòcì eci, bàakapàtuka è kubwela mu màyi nè kubàtìijibwàbò cyàkàbìdì, mu Dìna dyà Yesù Kilistò. Pòlò kubàtentekelayè byanza, Nyumà Mwîmpè kulwaYè pambidi pààbò. Kwambabò cipròfetà nè kwakulabò mu myakulu. Ncyà bushùwà anyi? Pòlò kwenzejayè bantu bàvwa bàbàtìijibwe kùdì muntu umweumwe wàkabàtìiiza Yesù awu, kubàmbilayè nè bìvwa bìkèngela bwà kubàtìijibwàbò cyàkàbìdì, bwalu kabàvwa babàtìijibwe mu Dìna dyà Mukalenge Yesù to.

Ndi nè bukenji bwà kwamba cintu cìmwècìmwè aci. N’Dilongesha dìmwèdìmwè adi.

227 Mpindyewu, cyàkambà Pòlò mu Ngalàtiyà 1.8 ncinyi? Mpindyewu, yèyè ngudi mwambè nànkù. Mbanganyi bàdì bamanyè nè aci m’Bulelèlà? Ambàayi nè: “Amen.” [Disangisha didi dyàmba nè: “Amen.”—Muf.] Ke yèyè kwamba nè: “Mwanjèlò yèyè mufume mu Dyulu,” katùyi nànsha twamba bwà muyiishi udi mupàtùke mu èkèleeziyà ànyi mu òngumba kampànda to! “Mwanjèlò wa mu Dyulu yèyè mulwè mwikàle ùyiisha èvànjeeliyò mukwàbò nànsha wa bìshi mushiilàngàne nè Ewu nùnkù, èdiibwè mulawu. Ànu mûngàmbì kumpàlà amu, ndi ngàmba cyàkàbìdì nè, nànsha twètù anyi Mwanjèlò wa mu Dyulu muyiishè èvànjeeliyò mukwàbò nànsha wa bìshi mushiilàngàne nè Ewu unùkaadi bumvwè ewu.” Nudi bamòne mwaba ùdì mukùmbì wà yelèkè muCidyè anyi? Nwamònu anyi? “Kàdì Mwanjèlò yèyè—yèyè muyiishe cintu cikwàbò nànsha cìmwè

kaciyi Eci to, èdiibwè mulawu.” Ncyà bushùwà. Èdiibwè mulawu. Kanùmutàbaleedi nànsha kumutàbaleela nànsha.

228 Piikalà mpaasàtà, piikalà mpàndànjilà, piikalà mu—mutangadiki kampàndà, anyi ní nganyi yònsò ewu, ùteeta bwà kukwenzeja bwà wèwè kubàtijiibwa mu mùshindù mukwàbò kanà wònsò pa kuumusha mu Dìná dyà Yesù Kilistò, lekèlaayi ngambè pàmwè nè Pòlò nè: “Èdiibwè mulawu.” Muntu yèyè munwàmbile nè: “Labùlàngàrà nè muiishi ku cyanza nè nèupetè Nyumà Mwimpè,” èdiibwè mulawu. Bwalu, Nyumà Mwimpè n’Dilediibwa. MbaMuswè mu cyàbò cipidi sungasunga.

229 Muntu kanà yònsò ewu mmumanyè, mungàmbi kumpàlà amu, dilediibwa dùtu mbukooyà, nànsha dyenzèkèlè penyi. Dilediibwa diikalè mu cikumbi, didi bukooyà. Dyòdi mu nzùbu, didi bukooyà. Cyòci ciikàlè mu lùpitaadi, mu cibambalu cilengeja nè bilòngò byà rose, cidi ànu bukooyà. Dilediibwa ditu misangu yònsò ànu bukooyà.

230 Nè Dilediibwa dipyadipyà kî ncintu cyà cishààdilekù to. Cidi bukooyà; kwela kwà mbilà nè tushibà, ànu kukungula, kwakula nè cikukumina, nè bintu byà mîshindù yònsò bimònàngàne. Cintu’s mbukooyà, kàdi cidi citwàla Mwoyi. Mùshindù wùmwèpelè wùdiku mwà kucyènza.

231 Kwàngacikù dilabulangana dyà ku byanza, anyi kufùndisha dìnà dyèbè mu èkéleeziyà kampàndà to, kubànda kwamba nè: “Ndi ngitabuujà Nzambi Taatù wa Bukolè bwònsò, Mufùki wa maulu nè buloba; nè Yesù Kilistò, Mwànà; èkéleeziyà munsantu wa Kàtòlikè wa cyena Loomò; nè bwobùmwè bwà bansantu.” Wèwè wenza nàнку, udi ujaadika nè udi mwena lubùkù.

232 Cyònsò cidi ciyiikilangana nè bafwè aci, nànsha ciikàlè cinyi, ndyabùlù. “Kùdi Mutwàngaji ànu umwèpelè pankaci pàà Nzambi nè bantu, m’Muntu awu Yesù Kilistò.” Nè Yèyè kî mmufwè to, kàdi Ùdi nè mwoyi. Nè Ùdi kaaba aka mpindyewu; Yèyè mmubiike ku bafwè. Bansantu bakwàbò bònsò bàà cyena Kàtòlikè nè bansantu bàà cyena Mishòònyi abu, nè bakwàbò bònsò abu, mbafwè nè bàdi mu lukità. Bàdi mwà kwikala mu Butumbi. Piikalàbò nè bàvwa bansantu, bàdi Mwàmwa. Nànsha bóbò biikàlè penyi, pawikalà wèwè uyiikilangana naabò, kakùyi mpatà to udi munkaci mwà kushipa mikenji yà Nzambi nè kupicila kùdi dyabùlù. Kî mmunsantu nànsha. Cyà bushùwà. Bible ngudi mwambè nàнку.

233 Ngàzamà wàkadyà aci, kàbidì, kàdi Nzambi neàcyalùje ku Nyumà mulelèlè, udi nè mwoyi wa Nzambi udi kàyì ùyiikilangana nè Yudà Munsantu kampàndà to, nè Munsantu *Kampàndà*, nè Munsantu *Kansanga*, nè Cecilia Munsantu, nè bakwàbò bònsò aba, nè bakwàbò bàà ku bansantu aba. Neciikalè Nyumà wa Yesù Kilistò wìkala mwà kwalukila nè kuDimwènesha nè kwenza cintu cìmwècìmwè aci. “Nèngààlujululè, mùdi Mukalenge wàmba.” Nè ndi nsàkidila

Nzambi, leelù ewu, pa ditàmbà dyà Èkèleeziyà udi mwab'ewu, kùdi Mwoyi mukese ùdi ùtwàdija kupàtukilaMù. Ùdi munkaci mwà kuDimwènesha Wòwò mwinè. Nzambi neàlujululè Èkèleeziyà mu kaabujimà ku cipidì Cyèndè cyà bushùwà cyàkàbidi, kumpàlà kwà Dilwa dyà Mukalenge.

²³⁴ Mukalenge Yesù, disangisha edi n'Dyèbè. Ndi mwambùle ànu bujitu bwà Dìyì, bwà kuDìyiisha. Dyàmanyi kuyishiibwa mpindyewu. Cidi mu byanza Byèbè, Mukalenge. Ndi ndòmba bwà nè mu Dìnà dyà Kilistò, Wèwè newàkidilèku bintu ebi, nè mu bukènkè bùdìBi biyiishùbwe abu, Mukalenge. Swàkù, pìlkakà kondò kanà kònsò kàà mwoyi katàpiibwe, swàkù bwà kwòndopiibwa kùdi Bwanga bwà mu Gilàdà. Swàkù bwà aba, Mukalenge, bàdi basòmbè kaaba aka bàvwa bamyaminyiibwè màyi, bapòngolwela màyi, anyi biinyiijibwe mu nzambi yisàtù abu, bàmonèku cilèmà cyàbò, Mukalenge. Ndi mwà... nànsha mèmè mwà kuyiisha munyi.

²³⁵ PaWàkayiishà nè kwenza cintu cimwècimwè aci, kàdi nànsha nànkù mèsù àbò àvwa mafofo. “Muntu nànsha umwe kèna mwà kulwa kùNdi pàdì Taatù Wanyì kàyì mumukòke to.” Nè nànsha muWùvwà muiyishè nè mwenzè bishimà, nè mujaadike nè Wèwè uvwa Maasiyà awu, kàdi kabàvwa ànu mwà kwitabuuja to, bwalu Yeshàayi uvwa mwambè nè nebìikalè mùshindù awu.

²³⁶ Nènku ndi mufwànyine kusàkidila eci, nè, leelù ewu, nànsha m'Ùdi mwenze bintu byàbùngi amu, Udi mutwàle Dìyì Dyèbè dilelèlè, muDyalùje kale mu cishimikidi cyà bàpostòlò, muDitèèke panshi mu kadyòmbò, kàà nè Didi Bulelèlè, nè pashiiishe Wèwè kwalukila buludi paanyimà pààDì nè kwenza bishimà byà mùshindù wùmwèwùmwè biWàkenza pa'Uvwà pa buloba apa abi. Cidi cyènzekà ncinyi? Kabèèna mwà kucyènza to. Bwalu, Pòlò mmwambè, ku Nyumà (mwàkambà Yeshàayi amu) nè: “Nebìikalè bapapè mitù, badibàndishi, banangi bàà bisànkasanka kutàmba kwikala banangi bàà Nzambi, bashipi bàà bipungidi, bashiminyinyanganyi bàà maalu, kabàyi nè didikànda, nè badyombodi bàà aba bàdi baakàne; biikàle nè cimwènekèlu cyà difwàna dyà Nzambi, kàdi bàvila Bukolè bwàdi: tàpulukaayi nè bàà nànkù abu.”

²³⁷ Mukalenge, ndi ndòmba leelù ewu bwà Wèwè kuDimwènesha nè—nè kuvwija Dìyì Dyèbè—Dyèbè nè mwoyi munkaci mwètù mpindyewu mene. Bwalu tudi tulòmba nùnkù mu Dìnà dyà Yesù. Bu Wèwè mwà kucyènza, Mukalenge, bòbò bònsò nebìitabuuje. Netwèndelè kuumukila mu tabernacle ewu mu dindà emu, twitabuuja nè musùukà wètù mmusùngidìibwe, bu Wèwè ànu mwà kubàtuminaci, Mukalenge, nè wàkule nè mwoyi wònsò, patùdi bindile dijingulula Dyèbè apa.

Lekèlè Nyumà Mwímpè, Mwoyi mulelèlè wà Nzambi awu, àbwelekù mu katùpà kakesè kàà ditàmbà kàdi kashàale aka.

Éyì Mukalenge, dipèèshàku dikàndà nè Nyumà Webè. Swàkù bwà . . . Ùdi ùfila bujaadiki, Mukalenge. Ùfila bujaadiki nè, Dìyì Dyèbè ndyà cyà bushùwà. Muntu yònsò ewu mmwena mashimi; Wèwè udi Bulelèlè. Nànsha bantu búngì kaayì bacikàndàmèèna; nànsha cyòcì cikèngela kufwìla diitabuuja, nànsha cyòcì cikèngela kwipaciibwa mu èkèleeziyà, nànsha cyòcì cikèngela kwenza kwà tumpanyè, mùdi nè cyà kwangata ànu muntu umwe nè kwimanyinapù . . . Bânà bàà Nzambì bakwàte nè byà luse abu, nebàpatukè, nànsha byà munyì, nànsha byà munyì. Nebàlwe, nànsha byà munyì, bwà kutèèleja.

238 “Mikòòkò Yàànyì mmimanyè Dìyì Dyànyì, kayààkulonda mwenyi nànsha.” Dìyì Dyèbè, mùshindù wùvwàDi dìbiikila mikòòkò Yèbè bwà musangu wà kumpàlà awu, Dìdì dìbiikila cyàkàbìdì. Nènku kayààkulonda mwenyi to. Piikalà Dìyì Dyèbè, dyàkàbìkila mikòòkò Yèbè adi, dyàmba nè: “Nyingàlàaayi, muntu nè muntu wa kunùdì, nùbatijjiibwè mu Dìnà dyà Yesù Kilistò,” Mikòòkò Yèbè mmiDyùmvwe. Mikòòkò Yèbè yìdì yùmvwa cintu cimwècimwè aci leelù ewu. Muntu yèyè mwambè nè: “Kaa, aci’s—aci’s ncintu cyà mufwilakanyi nè Kilistò. Bätijjiibwàyi, mu dìnà dyà ‘Taatu, Mwàna, Nyumà Mwîmpè,’” mwenyi kayààkulondakù to. Yòyì neyimanyè Dìyì Dyèbè. Neyitàngile byenzedì Byèbè. Ndi ndòmba, Taatu, bwà Wèwè kwenza byònsò. Dìyì Dyèbè ndyakùle, swàkù bwà byenzedì Byèbè bilondè. Mu Dìnà dyà Yesù. Amen.

[Mwanèètù wa balùme kampàndà ùdi wàkula mu myakulu—Muf.] Mpindyewu, mulundà wanyì, Nyumà Mwîmpè ùdi munkaci mwà kukwata mudimu.

239 Mpindyewu ndi nkoma batèèleji aba nyimà wanyì. Mpindyewu, ncyèna muswè bwà nwènù bantu bàà mu tabernacle ewu, mbitàmbe bwîmpè mèmè kutàngila *elu* luseke, Ncyèna muswè nànsha umwe wa ku beena mu tabernacle to; ndi muswè nwènù bàtù kacya kanùyikù bânjì kwikala mwaba ewu kwònsò eku to, anyì bamanyè nè mèmè ncyèna munùmanyè to. Bantu bàà pambèlù pàà cimenga abu, elàayi byanza muulu kàbìdì, bwà ngàmòna mwaba unùdì nusanganyibwa, nè nudi babèèdì. Nyumà Mwîmpè àtentemukè mpindyewu. Mpindyewu, kunùdì nwènù, ncyèna munùmanyè to.

240 Nudi nè twartà twà disambila anyì? Bàvwa bààbanye twà disambila . . . ? [Katùpà kàà mukàbà wà mèyi munda mutupù—Muf.] . . . mbalengè.

241 Nènku Yèyè àcyènzèku ànu nànsha misangu yibìdì. Bible mmwambè nè: “Mukana mwà . . .” Mbantèmù búngì munyì? “Bàbìdì anyì bàsàtù.” Ncyà bushùwà anyì? “Bantèmù bàbìdì anyì bàsàtù, dìyì dyònsò dijaadikiibwè.” Kwangata bóbò bakesè bàbìdì anyì bàsàtù, pashìishe bònsò bwènù itàbùùjaayi. Cyònsò cyùdì naaci dijinga aci, ùcitàbùùjè mpindyewu mene.

242 Udikù muswè kucyènza anyì, bu Yèyè mwà kucyènza? Elà cyanza cyèbè muulu, wámbe nè: “Nèn—nèn—nèncyàngàtè ku diitabuuja, ndi ngèèla ànu cyanza cyànyì muulu cyanààna.” Nudi baswè kucyènza anyì? Elàayi byanza byènu muulu, bantu bònsò mwab’ewu. Mbanganyì mwab’ewu bàdi bamba nè: “Kacya ncitukù mwànji kucimòna kwònsò eku to. Nèncyàngàtè ku diitabuuja, mèmè pàànyì?” Elà cyanza cyèbè muulu, wamba nè: “Nèncyàngàtè ku diitabuuja.” Tàngilà kùnweku.

243 Mpindyewu nudi bamòne pândi mwimànyine apu anyì? Kùdi kadyòmbò mwab’ewu. Mpindyewu, piikalàYe Nzambi, Yèyè neàDimwèneshè. Eci cyòci kaciyi Bulelèlè to, dîbà adi mèmè ndi mwena mashimi nè mupròfètà wa mashimi. Kabivwa bikèngela bwà nwènu kulwa kuntèèleja kàbìdi to, bwalu ndi mupròfètà wa mashimi; ndi mfila bujaadiki bwà Kilistò bùdi kabùyì bwà bushùwà to. Kwèna mwà kucyènza nè kujaadika dilongesha dindì. . . [Katùpà kàa mukàbà wà mèyi munda mutupù—Muf.]

244 Lwàkù. Wèwè udi wa munwemu, mu tabernacle, kî mmwòmò anyì, inàbànzà? Udi musòmbe mwaba awu nè cyanza cyèbè cyela muulu, kafulu kakesè katòòke ku mutù. Èyowà. Udi wa múnwemu. Nwamònu’s, pândi mmòna cyòci aci mwaba awu, bantu mbàdi munkaci mwà kukòka cikèèna-kumòna aci. Ndi mwà kuCimòna ciimàne ànu lwà ku mutù kwàbò aku menemene.

245 Kàdi ndi mwindile muntu kampàndà wùndi nciyi mumanyè to. Mònaaku, nwènu bàà ku tabernacle eku, inàbànzà udi nè mùshwàlè wèbè mwela muulu nùku ewu, udi musòmbe ànu lwà mwab’ewu ewu? Udi wa mu. . . Wèwè, udi—udi wa pambèlu pàà cimenga anyì? Juukilà kuulu bwà katanci kakesè. Paùvwà musòmbe mwaba awu, usambila apu, kùvwakù njiyà kampàndà yà pabwayi pa wèwè, dyàkàmwè. Awu ùvwa m’Mwanjèlò wa Mukalenge. Mpindyewu Yèyè mmwimàne ànu ku luseke lwèbè mene mpindyewu. Mpindyewu kùdi cintu kampànda, cyùdi muMulengè. Ncyèna mumanyè nè ncinyi to. Kàdi udi wa pambèlù pàà cimenga. Udi mufwànyine kwikala wa ku Louisville, anyi ku Tennessee, anyi mwaba wònsò wùdi mufwànyine kwikala awu. Ncyèna mumanyè to. Nzambi ngudi mumanyè aci. Kàdi bu Yèyè mwà kumbuulwila cyùdi. . . mùnsokòntù wà mu mwoyi wèbè, ùmanyisha dijinga dyèbè—dyèbè, anyi cintu kampàndà cikwàbò, nenwìtabuuje, witaba Dìyi, wènza bintu byònsò ànu bu. . .

246 Mpindyewu nwènu bònsò, bàdi batàngile mukàji awu, nenùmonè. Mpindyewu lekèlaayi Nyumà Mwîmpè, piikalàYe ùcidi ànu Nyumà Mwîmpè, Àcibuulùlè. Kanùciinyi to. Yèyè ùdi Nzambi. Ùtu ùshààla mukwàte ku Dìyi Dyèndè, ku Dìyi dyònsò.

247 Mukàji ewu ùdi ùsaama disaamà dyà mutù, disaamà dyà mutù. Ncyà bushùwà, elà cyanza muulu. Udi kàbìdi nè disaamà dyà mwoyi. Aci’s mmwoyi mubindùlùke. Udi ùkusaama bibi bikolè paùdi ulààla panshi, ùkupàtakaja mweyelu. Uvwa

mupandiibwe. Dipandiibwa adi kî ndyânjî kwondopiibwa to. Ncyà bushùwà. Kî mmwômò anyi? To, kwèna wa mu Ohio to. . . Udi wa mu Ohio. Udi wa mu Ohio. Èyowà's, mukalenge. Wèwè udi nè bujitu pa mwoyi wèbè. Mmwânà wa bakàjî kampàndà, anyi cintu kampàndà. Mmwânà wa bakàjî, mujìmine. Aci's ng'EMU MMÛDÌ MUKALENGE WÀMBA. Ndàaku, wàkidile cyûdi mulômbe aci, inàbànzà. Wàlengi Cintu kampàndà. Udi witabuuja anyi?

Nganyì mukwàbò uvwa nè byanza byèndè byela muulu. . . ? [Katùpà kàà mukàbà wà mèyì munda mutupù—Muf.] . . . munda emu?

248 Udi witabuuja nè Nzambì ùdi mwà kunsokolwela bwalu busokòmè bwà mu mwoyi wèbè anyi? Udi witabuuja nè n'Nzambì umweumwe ùmvwà nyiisha mu dindà emu awu anyi? Udi nè mundidimbì mufiike pamutù pèèbè, nkànsèrè. Udi witabuuja nè Nzambì neàkwondòpè anyi? Udi witabuuja anyi? Èyowà, mukalenge, nànkù alùkilaaku ku Ohio kùdi mufùmine, ku Lebanon, alùkilà ùsangalè, witabuuja Mukalenge Yesù Kilistò. Ndàaku, itàbùùjà.

249 Inàbànzà mutekète udi musòmbe mwab'ewu ewu, byenzè bu. . . Ùdi nè dikòbà òmusunsuma. Juukilà kuulu, munanga wanyì. Udi witabuuja anyi? Cìvwa cikupapùle ndambù, kî mmwômò anyi? Èyo. Cìdi. . . Neùcitàmbè. Neùmvwè bìmpè. Ndi nkùmòna, pashìishe. Alùkilaaku kwèbè kumbèlu, ùsangalè.

250 Muntu uvwa mwimàne kuulu ànu mu tusunsa tukesè emu awu ùvwa nganyì? Muntu kampàndà lwà paanyimà apu mmùjuuke kuulu, mwaba kampàndà. Wèwè udi nè cyanza cyèbè cyela muulu awu, juukilà kuulu. Udi witabuuja nè Yesù Kilistò ùdi mwà kungambila cìdi lutàtù lwèbè anyi? Udi ucìitaba anyi? Udi witabuuja nè dipondo adi nedikuumùkè mu nshìngù mwèbè anyi? Mukàjèèbè udi musòmbe ku luseke lwèbè aku, ùsaama disaamà dyà mutù. Ncyà bushùwà, kàbidi. Nudi bònso bàà ku Ohio. Tentèkà cyanza cyèbè pambidi pèndè apu, mwanèètù.

251 Mukalenge, swàkù bwà bòndopiibwè, bàalukilè ku mààbò, bènda bàcyònkómoka nè bàsangalè, ku Yesù Kilistò Mukalenge wetù. Amen.

252 [Katùpà kàà mukàbà wà mèyì munda mutupù—Muf.] . . . muntu kampàndà udi ku luseke lwèbè awu. Angàtà Dìyì dyànyì; ndi nkwabìla Dìyì dyà Nzambì. Nudi nuCìitabuuja mpindiyewu anyi? Bònso bàdi bìitabuuja, ambàayi nè: "Amen." [Disangisha didi dyàmbe nè: "Amen."] Dìyì dyàmweneshiibu. Didi Bulelèlè.

Mpindiyewu inyikaayi mitù yènù.

253 Mukalenge, nyèwù ndwa Kùdi mu Dìna dyà Yesù, mwikàle nsambidila bantu aba. Dìbà dikaadi diyè, Mukalenge. Nènku dìbà dikaadi diyè bikolè kutàmbe nè mutùdi twètù twela meeji. N'Dilwa dyà Mukalenge, dikaadi pabwìpi. Tudi tulòmbe bwà luse Lwèbè lwàlabajiibwè. Bapèèshèku, Mukalenge,

dyondopiibwa dyàbò. Ndi mpindyewu mpiisha dyabùlù, pa Bukênkè bwà Díyì dyà Nzambi; bwà nè Yèyè ùdi Mwânà wa Nzambi, bwà nè Yèsù Kìlistò Mwânà wa Nzambi ùdi umweumwe awu makèlèlèlè, leelù, too nè kashidi, dibàtiiza dyà mu mâyì adi mu Dínà dyà Yèsù Kìlistò ke didì dijaalàme . . . 

59-0823 Ngàzamà, Lokùsètà, Yelèkè, hazilà
Branham Tabernacle
Jeffersonville, Indiana États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org